


O MWE SHIKULU, UMUKUFYE UMO NAKABILI

 Mwashibukeni, mwe fibusa, nangu icungulopo mukwai. Nalitoba inkoloko yandi, Tekuti nande ifyo inshita ili. [Munyina atiila, “Lucili lucelo, munyina.”—Kale.] Lucili lucelo, eflyo kuli? Cisuma.

² Nangu cibe fyo, ifwe tuleikala mu Muyayaya. Ifwe tatwawkwata inshita. Ukupendwa kwa nshita kwalekele lintu Yesu Kristu ampele u Mweo Wakwe mukati kandi, ukwikalilako, eico ifwe tuli fibumbwa fya Muyayaya inoine nshita, ukwikala capamo muncende shamu Myuulu muli Kristu Yesu. We nshita we!

³ Nomba buno bushiku fye bwandi ubwa cibili kuno pamo naimwe, lelo, mwe, cili kwati luto lwa buci ulwatalala ulucelo, lwena luntu lwatikama nganshi kabili ulwawama. Nshatala ipakisha nganshi ukucilapa mukulongana ukuli konse. Kabili Ndelolekesha ukuli konse nomba muno bushiku, bena nabatitikana ngashi mpaka Ine tekuti mone nangu umo, lelo ileelo kuti Nalolekesha ukuli konse. Nalikwete ishuko lyakuposhanya muminwe neli bumba ilisuma ilya bakapyunga muli ili bumba muno.

⁴ Ndeibukisha umuntu umukote uwaleisa mu chalichi lwesu, uwe shina lyakwa John Ryan. Elder Ryan, eflyo balemwita. Ena alefuma ku Dowagiac, ku Michigan. Kabili kuti ashimikila panono, kabili elyo abutuka abwela nokumposha mukuboko kwandi. Nakabili kuti ashimikila panono, kabili abutuka abwela no kumposha mukuboko kwandi. Natiile, “Munyina Ryan, Nde—Ndetasha ico, lelo Nshi—Nshishibe ubupilibulo umulandu ulecitila ifi.”

⁵ Atiile, “Lintu batili yacepa amaka, Ndekabila yena ilundwemo amaka, eico Nacilundwamofye amaka.”

⁶ Nacimonafye ka—kapyunga waku Methodisti ukufuma kulya mucalo candi, uyo uwapokelelefy Mupashi wa Mushilo, kabili Nali mubatishe. Uwikele kulya lubali lwaku kuso kwandi, Munyina Junior Jackson. Nimumona ena aletensha amaboko nga filya, caciba nge canjibukisha pali Munyina Ryan. Nibanga abatontokanya ukutila ba Methodisti tekuti bapokelele Mupashi wa Mushilo? Imwe muli mucilubo. Iminina, Munyina Junior Jackson, ena no mukashi wakwe umusuma uyo. Bena bafuma mu Indiana kulya, kapyunga wamu Methodisti.

⁷ Alikwi Willard Collins? Bushe ena ali mucikulwa muno lucelo? Ubelele pesa, Munyina Willard? Nacitontokanya ena

ukuba kuno lubali. Naumbi kapyunga uwaku Methodisti naiminina kuno lubali, nga imwe tamutontonkanya ukutila ba Methodisti kuti bapokelela Mupashi wa Mushilo kabili no kubatishiwa cipyacipywa. Iminina, Munyina Collins. Kuliko naumbi. Munyina ali kulya ku Asbury College pa Wilmore, Kentucky, ukufuma ku ntendekelo isuma ya Methodisti.

⁸ Nomba kuliko na bambi abantu pamo naine kuno, abo abali—abo abeshile. Nacumfwa bena ukusosa “ameni,” kabili Ninjishiba bena bali muno, lelo Ine nshile bamona. Munyina—Munyina Fred Sothmann ukufuma ku tabernacle ku Jeffersonville. Fred, bushe iwe na Munyina Tom muli muno? Ndecetekela Ning’umfwa ena ukusosa, “Pano.” Kuno lubali mu cifutu, ee.

⁹ Ifwe tuli abansansa nganshi ukulanga aba abaume. Ine nshilemona saana pali iyi nshita, kuliko nalimo nabambipo muno abo Nshaishiba. Ndetontonkanya Munyina Jack Moore acipwishafye ukulanda. Kabili—kabili eico aba abaume basuma, kabili ifwe twalibatemwa.

¹⁰ Kabili nomba yena ili ni nshita isuma iyakuba kuno. Nacisosa ku mukashi wesu, umukashi wandi, Nacitila, “Iwe, iwe nga walishile muli uku kulongana.” Twalicetekela mu busuma ubwa nshita-yakale ukulongana kwa pentecosti. Ifwe twalicetekela, ukutila ukuli ubuntungwa mu Mupashi wakwa Lesa, icakutila fyonse ifiputulwa ifyapusana pusana ifya filonganino kuti fyaisa capamo nokwikala capamo mu ncende shamu Myuulu, nge chalichi. Ukupusana kwesu takulenga ubupusano kulya, lintu ifwe tuli muli Kristu, ifwe tuli pesamba lya Mulopa kabili mwisenge lya kutemwa Kwakwe.

¹¹ Kabili Ndefwaya ukulanda ici kuli ili bumba ilyaba kapyunga. Na—Naaishile mu Pentecosti ukufuma ku Missionary Baptisti, kabili Ndakumbwa Pentecosti. Bena bantu bandi. Nali batemwa bena. Nga Nalitontonkenye nga kwaliko i chalichi icili conse icalungamapo ukucila filya, Ine kuti naba ku chalichi ico cimbi. Lelo Ndi pamo na Pentecosti, pantu Ndetontonkanya ukutila cilya e cintu icapalamishako eco Mona ku Malembo. Nga Nalishibe icintu cimbi, Ine kuti naba pamo nabena; kabili eico, tekusula icisumino cimbi icashala, awe nakalya. Lelo umulandu Ntontonkanya pali Pentecosti, nipa mulandu yalipalamishako kufyo Ntontonkanya ifyaba mu Malembo, ukucila pa cintu icili conse ico Naishibapo.

¹² Kabili kuliko icintu cimo icapulishamo muli uyu musonkano, ico Mwene, cili, ni banamayo abafinso-ifya busaka; tapali ifyakubika kumaala, namwishiba, nangu fyonse ifyo mwita filya fintu. Nshafitemwa filya. Filya tafyalinga kubena Kristu. Huh-uh. Ico nacilungama. Ine—Ine nalitemwa ico. Ndi isukulu lya nshita-yakale ilyo lyatemwa ubusaka,

mwamona. Nalitemwa ukumona abanakashi... Namwishiba, Nshilepilibula...

¹³ Ino tencende iya kusoselako icintu icili conse, impulwe nefyamusalula, ukusose fyo. Lelo Nshilesosa iciukupilibula filya. Ino tencende yaifyo.

¹⁴ Nakuba, ni lilali ilyo imwe bonse mwasendele ici cintu? Ici caishile ukufuma kwi hema lyandi, efo cilemoneka. Mucine efo cili. Bushe ico nacilungama, mwe chalichi? Bushe cilya tacilemoneka nge cintamba cakale? Ukuba, Ndetontokanya imo ine iyakale Mbila ifwe tushimikila kulya ilaya ukupitapo, nakuba.

¹⁵ Eico namwishiba, kuliko fye umwanakashi umo muli Baibele uyo watalile ukulenga icinso cakwe. Kabili ena talengele icinso cakwe ukukumanya Lesa. Ena alengele icinso cakwe ukukumanya umwaume. Ico nacilungama. Namwishiba ifyo Lesa acitile kuli ena? Amulishishe ena kumbwa. Eico ilyo mwamona umwanakashi nalenga icinso, imwe muleti fye, “Mwashibukeni, Missi Inama-Yambwa.” Ifyo efo fine cili. Ciibi, teifyo fine? Lelo filya efo Lesa atontokanyapo palwa ico. Ena apangwafye inama iyaseka iyambwa ku mbwa sha mumpanga. Filya efo ena ali. Imo iyi mimbulu ya mumpanga ipitana, ukulisha iminsoli, namwishiba; ifyo bena beta umunsoli, namwishiba. Filya efo cena cili, inamafye yambwa nakabili.

¹⁶ Ndetasha pali imwe mwe banamayo. Lesa apele nkumbu ukumwikatilila mucinso calupanda, talukeniko ukufuma kuli ifi fintu fye sonde. Panuma yafyonse, ifwe tuli munshila yesu ukuya ku Bukata. Ifwe tuli abekashi aba Bufumu bumbi.

¹⁷ Inshita yakale saana... Na cilalolekeshafye konsefye pebumba ukumona nga kuti Namona umo mubantu, kabili balya nibamo abanensu abafishi, a Bantu bafita. Namwishiba, inshita yakale saana, kuno lubali kukapinda ka Kukuso, balebacita abasha ukufuma muli bena. Nomba, Ine ndi wakukapinda ka Kukuso. Kabili kuliko icintu cimo Ningatemwa ukusosa pali bena, Ndekabila nga kuti Nalanda kuli Martin Luther King. Ulya umwaume, ukuba umwina Kristu, teshibe ena aletungulula abantu bakwe mulya mwine muciteyo ca mfwa, uko kuli nokuba ba million muli bena ukwipaiwa. Mwamona? Ena ali mucilubo.

¹⁸ Nalitemwa ba munyinane, ba munyinane abafishi. Ine tekuti mbe mu Africa no kushinguluka, ukushimikila kuli bena, nga Nshabatemenwe. Bena bantu bakwa Lesa, cimo cine nge fyo twaba. Lelo Nshacetekela cilya... Ulya umwaume, pali ici, akalengafye abengi, abengi, abengi ukucila muli bena ukwi paiwa. Nomba cili nokutampa bucisanguka nakabili, cilya tacakatale ukufuma mu bantu kuno lubali. Eico bena tebasha. Bena balikwata ubuntungwa nganshi nga onse uwashala. Bena, nga bena bali basha, Ine kuti naba kuli lulya lubali. Lelo bena tebasha.

19 Nipa mulandu fye wakutila bena balefwaya ukuya kusukulu. Bena balikwata amasukulu. Lekeneni bena baleya kusukulu. Ico cishinka.

20 Cali kulya, ibukisheni ulya umukote munyina umufishi ukwiminina, lulya lucelo, muli cilya cimfulunganya. Ena aipwishe abashilika nga ena kuti alanda. Atiile, “Ine nshatala ukuba na nsoni pa kuba umuntu uwafita. Kalenga wandi Anengele ukuba umuntu uwafita. Lelo muno lucelo, Ndine nsoni umusango umutundu wandi ulecitilamo. Nifinshi ifyo aba bantu balecita kuli ifwe? Baba fye bwino kuli ifwe.”

21 “Umwanakashi uwabuta,” alimine kabili atiile, “Nshilefwaya abana bandi ukusambilishiwa no mwanakashi uwabuta,” atiile, “pantu bena...ena takabikeko a—amano, ukuposako amano mubana bandi nga filya umwanakashi umufishi ali kumutundu wandi wine.” Atiile, “Kulya, lolekesheni ku masukulu yesu. Balikwata ifishiba fya kowelamo. Bena balikwata amasukulu ayasuma ne fintu fyonse. Mulandu nshi tulefwaila ukuya kumasukulu yabo?” Ico cinshinka.

22 Nalicetekela Lesa ni Lesa uwa—uwa, ukuba, Ine kuti nasosa Ena ni Lesa wafya pusana pusana. Ena alalenga impili ishikulu ne mpili ishinono. Ena alalenga ifiswebebe. Ena alalenga imitengo. Ena alenga umuntu uwa buta, umuntu uwafita, umuntu uwakashika. Ifwe talingile ukutobenkanya cilya. Cilesa mukuba icatobenkanishiwa. Kabili icintu icili conse icatobenkanishiwa tekuti ciifyale icine. Imwe muleonaula umutundu wa bantu. Kwalibako ifintu fimo pa muntu umufishi ifyo umuntu uwabuta takwatako ilya imibele. Umuntu wabuta ena lyonse alacita ifikansa no kusakamana; umuntu umufishi aliba uwaikushiwa mu mibele abelamo, eico tabafwaikwa filya fintu.

23 Lelo kunuma munshita ya busha, baleshitisha abasha, abantunse, nga filya umwakushitisha ifipe, ngefyo bengashitisha motoka iyabomfiwapo. Kwaliko kashita uwaishile, ukufuma mucalo, kabili ena alebashita, nokuya bashitisha nokupanga indalama pali bena, nga filya imwe mwingacita pali motoka iyabomfiwapo atemwa icintu cimo.

24 Tacatala aciba ubutantiko bwakwa Lesa! Lesa alengele umuntu; umuntu apangile abasha. Umo talingile ukuteeka pa munankwe. Ifwe tulingile ukwikala capamo mu mukwampana namu mutende.

25 Kabili uyu mwaume alishile kwibala ilyakale ilya fimuti. Ena—ena alefwaya. “Ni banga abasha abo ukwete?”

Atiile, “Umwanda umo atemwa ukucila.”

26 Ena alebalolekesha, kabili asukile amona, kwaliko umusha umo pakati kabalya bantu . . .

27 Abasha bali nobulanda. Ama Bunu yaku Africa yaliketete abasha, nokubaleta kuno lubali nokupanga, nokubashitisha. Kabili bena balishibe bena tabakatale ukubwelelamo ku mpanga ya kumwabo. Bena balishibe bali kuno pa nshiku shonse isha bumi bwabo. Bena tabakatale ukumona abana babo nakabili. Bena tabakatale ukumona bawishi nangu banyina. Bena bali kuno panshitafye yonse, kabili bena bali nobulanda. Kabili bena balesenda namembya, nokukapaula bena, ukulenga bena ukubomba. Kabili eflyo balelenga bena ukubomba, pantu bena tabalefwaya ukubomba. Bena balifye bonse aba bulanda.

28 Uyu kashita wabasha aolekeshe kulya lubali. Kabili ena asangile pakati ka aba basha, kwaliko umu muntu wacaice. Bena tabalingile ukumukapa; icifuba icatutumuka, akalefulefu pa muulu, alifye pa mulimo. Kabili uwaleshita atiile ku mwine wabasha, atiile, “Ndefwaya ukushita ulya umusha.”

Atiile, “Ena tewakushitisha.”

Ena atiile, “Ena alemoneka uwapusana ukufuma kubasha bambi.”

Atiile, “Eflyo ali.”

29 Atiile, “Cinshi cilengele ubupusano? Bushe ena emukalamba pali bonse abashala?”

Atiile, “Iyo, iyo. Ena mushafye.”

30 Atiile, “Nalimo iwe ulamulisha ukupusana ukucila ifyo ucita abashala muli bena.”

31 Ena atiile, “Iyo, ena alya mucikulwa nabashala abasha.”

Atiile, “Ni cinshi icimulenga ena ukuba uwapusana nganishi?”

32 Atiile, “Ine lyonse nalesunguka ico, naine wine, mpaka naishilesanga. Kulya mu mpanga ya kumwabo, mu Africa uko ena afuma, bawishi nimfumu ya mutundu. Kabili temulandu naponse apo ali, ena acili alishiba ena mwana wa mfumu, kabili aicita nga umo.”

33 Aleluya! Nga iwe uli umwana mwanakashi wa Mfumu, nombamba mwilacita nge sonde. Nga iwe uli mwana mwaume wa Mfumu, mwilacita nge sonde. Ifwe twaba, ifwe twalishiba ukutila ifwe tuli bana baume nabana banakashi bakwa Lesa. Nangula ifwe tuli muno mucalo camfifi ica mfwa no bulanda, nombamba ifwe twalishiba uko ica bupyani cesuabela. Ifwe tuli bana baume nabana banakashi ba Mfumu; te mfumu, lelo Imfumu. Lekenitucite ngeflyo.

34 Inshita ishinono ishapitapo, umulandu Nacicelelwa, umunono umukashana umwina Ethiopia uwacilawamya umuputule, kabili Nacimona ena acilacita icintu cimo. Nacilaesha ukulemba isambililo limo ilya Malembo pa cintu cimo ico Nacilafwaya ukulandapo. Mwi esha ukwisa ukulanda

ukuti mumfwike fye; Ine ndesa ukulanda icintu cimo ico cili no kwafwilisha i chalichi, ukupela ubwafwilisho. Kabili ilyo Ndebelenga, na uyu namayo umunono ali ngo uuleshimashima. Apo pene atile, “Bushe kuti mwanjelelako, mukwai?”

Kabili Nacitila, “Ee, mayo.”

³⁵ Kabili ena acitila, “Ba njeba ukutila imwe muli umuntu uyo wasanga ububile ku cinso cakwa Lesa, ukutila ilyo imwe mwapepelela umulwele, ukutila Lesa alasuka amapepo yenu.”

³⁶ Nacitila, “Ena tasuka fye ayandi, lelo Alasuka uuli onse uyo uli nokucetekela Ena.”

³⁷ Acitila, “Nindwala, mukwai. Bushe kuti caba icakufuma munshila nga cakutila Nalilombele imwe uku nkwatilako ipepo ilinono?”

Nacitila, “Awe nakalya.”

³⁸ Naci palamina kuli ena. Nacipepa umusango ngo uyu. “Shikulu Yesu, imyaka ingi iyapitapo, lintu Imwe mwalekula ulupanda ulwakale ulwakalabana pa muulu wa lupili ulwa musensenga, nokushila ifishilwa fya nkasa ifya Mulopa uyo uwalekonkoloka ukufuma munuma Yenu. Uwenu unono, umubili uwanakuka waishile naka nganshi icakutila Imwe mwaliponene pe samba lya cisendo. Kwaliko umu awaiminine palya, uwe shina lyakwa Simoni, umu Negro, ena alimisho ulupanda no kwafwilisha Imwe ukusenda lwena. Uyu apa uwamu bana bakwe, muno lucelo, nalwala.” Na pali ilya nshita, caci citika. Mwamona? Ena ni Lesa uwa mitundu iya bantunse bonse.

³⁹ Nomba, bacibusu, imwe muli bumba ilisuma nganshi. Kabili ine ukuba uufumine mwibala, ilya bu minshoni kulya kunge, ku cinso ca fiwa na bashinga’nga, nafimbipo. Imwe mwitontonkanya ukuti tabakapinkane na imwe. Imwe mulingile ukwishiba ico imwe mulelandapo ilyo mwaisa kuli bena. Lelo pesamba lya ca musango uyo, kabili elyo kwisa kuno uko imililo yaku mwesu ilebilima pakati ka bena Kristu, na fimbipo, imwe tamwaishiba ifyo ukupemwina kuli pa muntu ukwimina ngefi. Ndekabila nga kuti Naikala fye kunuma kulya mwibumba no kumfwa aba abasuma ba munyina abasubwa ukushimikila i Cebo, kabili Ine kuti ndeimyafye amaboko yandi no kulila, no kubilikisha, no kupepa. Kabili ifyo ca—ifyo ca—ifyo cena caba, ukukaba ku Mulilo. Cena cintu cawama nganshi. Lelo ilingi line. . .

⁴⁰ Ba munyina, Nalikwata abengi nganshi ba munyina abo abantemwa, kabili bala nomba ine ukulanda. Kabili eico kanshi Nalishiba, ukuli ukwitwa kumulimo uwa Mfumu, Ningile ukweshu uku bomba namaka Yandi yonse, lelo lyonse Ndapitilishapo pakukokola. Kabili Ni njishiba mulelolela ica kulya cenu ica kasuba, mwikele muno ukutula eiti koloko ulucelo, nangu ifyo, muli ili bumba lya bantu. Lelo

Nacitontonkanya ukuti, ukwisa muno cungulo kasuba ukulanda kuli imwe pa kashitafye akanono, Nacilemba amashiwi yamo apa, na Malembo, yantu Ndefwaya ukulaloshako. Kabili mukucita ici, mukutontonkanya ukuti namukwata abaume kuno abalingilila ukucila, kabili nobwite bwakwa Lesa, uksenda ici cifulo, ukucila ine. Lelo ulwandi kupepela abalwele, ukumona ifimonwa, nafimbipo.

⁴¹ Kabili Na cilalanda kuli umo ama mineti yanono ayapitapo. Ngamwa lolesha muli *Life* magazine, umweshi wapwile, mukamona mulya. Kabili namukwata ulya tepu. Nshili musulwishi wamatepu. Lelo nga mwalitala amucetekela Amashiwi yantu Nshimikila, kabili ngakuti mwakumanisha, shiteni *I Fikakatikilo Cinelubali*, na pakubala shiteni *Ni Nshita Nshi, Mukwai?* Umfweni kufyalandilwepo, imyeshi mutanda lintu tacilati ukucitika. Kabili scienci naisunguka. Naiminine palya pene pesamba napo calecitikila palya. Nokubeba, imyeshi mutanda ilyo tacilati, ifyo kuli nokuba ba Malaika cinelubali mu mumibele ye bumba lya yantanda, kabili bakamoneka nga pyramidi, bakekila. Kabili Ine nkeminina ku kapinda ka kukuso ukwa Tucson, Arizona, kabili kuli nokuba iciunda icikatensha nangu mabwe ukufuma mumpili. Munyina Fred Sothmann uwikele palya, uwaiminine na ifwe, abengi muli abo, ilyo ca citike.

⁴² Nomba scienci yalikopele icikope ca Ciko, mwali Cimona, cali pa Associated Press. Taba ishibe Cali cinshi. Kuli i Kumbi ili seme, mumulu ba mailoshi amakumi yabili na mutanda. Ilili bamailoshi ikumi limo na fisano, atemwa amakumi yabili, ukucila napasangwa umutonshi. Bena tabeshibe icilecitika, kabili baleesha uku Cifwailisha. Kabili palya, pesamba lya Ciko, Nali ninjiminina. Kabili nabalya ba Malaika cinelubali amashiwi yabo yalebulukuta, palwa filya Fikakatikilo Cinelubali, ukwiminina palya. Kabili inte, ifwe batatu, nga inte shafintu ifya sesemwe pali tepu, *Mukwai, Ni Nshita Nshi?* Kabili kulya bena baleesha ukusanga. Cankama kuli bena.

Bamo muli bena batile, “Kabiye, kabiye, cinshi taulebebel?”

⁴³ Kuti caba fye ngalintu Malaika wakwa Shikulu amoneke kuno ku Houston, Texas, muli lulya Lubuuto. Naebele abantu, “Mubumi bwandi bonse Ndamona lulya Lubuuto.”

⁴⁴ I chalichi calishiba ici. Scienci yalishiba ici. Ifili, ifintufyonse fifwile ukupela ubunte ilyo Yesu Kristu acita cimo. Efyo cili. Magazine, nga cakuti mulefwaya ukuloleshamo, ni ulya umwaba Rockefeller kabili no mukashi wakwe pa numa. Ndetontonkanya ni ulya *Life* magazine wamu May. Ena ni Lesa. Tuleikala munshita shampela.

⁴⁵ Nomba Naisa muno lucelo ukweshwa ukubulapo utunono pa filembelwe apa, ne fintu, ukulanda pafintu fimo ifingafwa

ichalichi, ifingafwa pamo naba munyina bakapyunga, ukubika ifipeya fyandi ku mupeto pamo naba baume. Ifwe tuli bamunyina, kabili bena bandeta kuno pantu bacetekela mu bupyungishi bumo bwine. Naupusushiwa muli ukukulongana, ciinshi teti usendele bumembela pamo naya ama chalichi ayasuma aya pano ayacetekela uyu musango wabupyungishi. Bena, bena bali cicetekela, bala citungilila. Kabili Na—Na isa ukuti twingabika a Malembo kabili pafintu ifingafwa ichalichi.

⁴⁶ Kabili isambililo lyandi, nga, muno lucelo, nipa cipimo nshi ico Ndetontokanya i chalichi ca Pentecosti cili muli buno bushiku. Kwiminina nshi kabili ninshita iyo twiminine mo, kabili finshi fingaba? Nomba lekeni nkonkomeshe ico nakabili. Cipimonshi cintu ichalichi cimininemo nomba, kabili fintunshi fili kuntanishi yaciko?

⁴⁷ Nde fwaya ukusoma ukufuma mu Malembo, kwisambililo, kabili Ndefwaya ukubelenga ukufuma mwi Buuku lya Bapingushi, chapitala 16, na versi yalenga 27 na 28.

Kabili ne nga'nda yaiswilemo abaume nabanakashi; eko bali na balupaka bonse baba Pelishite; napa mutenge pali nalimo amakana yatatu abaume na banakashi, kabili abaletamba ukwangala kwakwa Samsoni.

Kabili Samsoni alilile kuli SHIKULU, nokutila, Mwe Shikulu LESA, shi njibukisheni, Ndelomba, . . . shi nkoselesheni, Ndelomba, umuku umo fye, O mwe SHIKULU, ukuti Ine ninga . . . nandulwe muba Pelishite icilandushi cimo ica pa menso yandi yabili.

⁴⁸ Kuti natemwa ukubulapo isambililo apo, ukufuma apo O Mwe Shikulu, Umukufye Umo Nakabili. Shikulu Enga paala ukubelenga kwa Cebo Cawe.

⁴⁹ Cifwile cali i—i cungulo icisuma, cimo kwati ifyo tuleipakisha ileelo pano pali ici cibansa ca nkambi, muno mu Hot Springs, Arkansas. Kabili kwali ukusefya ukukalamba ukwaliko, lelo ukwapusana saana nokusefya kwa ino nshita. Kwali aba Pelishite napamo nga amakana yatatu abalelolesha panshi ukufuma palya pafipuna fya pamuulu, kuli babili abaibela abaingile mu lubansa lukalamba, kabili na bashimucindikwa abakalamba ba fita nabanamayo babo abafwala ifyakoswa—ifyamtengo bonse nabekala mufifulo.

⁵⁰ Kabili ngefyo cali lilya, kwaliko, Oh, cimo icapala nga ubowa ico icali palya, icikulwa icatentekwa pa fipilala ifya iminine, cimo icapala nge mikulile yanomba iya acitekiti, aci . . . acitekica. Kabili nabonse aba aba Pelishite bakolongene kulya, nabekala pamuulu ku mulandu wa ici cintu icikalamba. Kabili bali muli ukukusefya ukukalamba, namenso yonse yatontele pakati kalubansa. Bafwile baliminine, ukukwata u—u kumona bwino pa cintu icali nokucitika.

51 Kabili nomba ilyo twikele pano muno cungulo, natumone nga kuti twa, mu kwelenganya, tuibike muli cilya cifulo, ukulolesha pa ncende iyi. Finshi twamona?

52 Ukwisa, ukufumina pakati kalubansa, kwaisa akalumendo akanono, kekete ukuboko kwa mwaume impofu, alewishikana, nakonkamo aletalantanta. Balimwene ifyangalo fyabakolwe ifingi, no—no tumayeye, nafimbi po; lelo nomba yafika inshita iya cangalo cikalamba, icintu ico balelolela panshita nkalamba, ubwangalo bukalamba ubwa ubu bushiku. Ifyakutangilila fyalipwile, Imiputule iyali ne ciunda akasuba konse ica bantu abakolelwe abaleipakisha. Pantu, balesefya ukucimfya kwa kwa Dagoni, isabi-umulungu wabo, pacipao napa bulayo bwa kwa Yehovah.

53 We mimonekele ya musebanya ifyo cili, ngatwa elenganya ica musango uyu cilecitika; palwa mulungu-isabi uwa calo icisenshi, cilesefya ukucimfya paba bomfi bakwa Yehovah, fyonse kumulandufye wa mwaume ukufilwa ukucita ifintu ifyo alashikilwe ukucita. Kabili apa pali umusenshi, nakolwa, ukupanga-icongo, abanakashi bafwala ifyakoswa ifyauma umutengo, ifinso ifya pentwa, ukusefya kwa Hollywood wa nomba, ukuleta umubomfi wakwa Shikulu Lesa, nakakwa mu makoli, kubwangalo bukalamba ubwa cungulo.

54 Umulumendo afwile aletinta kulya, mukuipununa, kwaisa uyu mubili uwa muntunse umukalamba, amenso yonse yabili ayatonkolwa, umushishi naukopokela panuma yakwe, uwakakwa kabili muli bunkole, ukuti acite ubwangalo ukusansamusha abakolelwe, ibumba lya fyongo lya bashacetekela. Afwile aipumine kucipilala apo bali no kwambila ubwangalo.

55 Nga Natontonkanya pali ico, Ndetontonkanya pa chalichi ico ica lashikwe na Lesa, ukucitila Lesa icintu cimo. Kabili lwaleka umulwani ukululenga ukupofula ku Cebo cakwa Lesa wa mweo naku Malango yakwa Lesa, kabili nakumulimo uo lwalashikilwe ukucita kuli Lesa; lelo ukuba icangalo mu bumfisolu muncende shaba cakolwa, ifinso-fyapentwa, abasama ifyakoswa ifyaauma-umutengo, bakafwala-tuputula, abanakashi bakaputula-mushishi, na baume ba mwisonde. I chalichi icifwile ukulabeka mu nsambu na mumaka yakwa Lesa! We musebanya we!

56 Ifyo cifwile cali ica musebanya kuli Samsoni! No bubumbo bwakwe bonse, uyo uwalecita ukucilapo, kabili ashininkishe Lesa ukuba na maka Yakwe ukupitila mu bubumbo bwakwe. Kabili nomunofu onse uwo atalile kukwata, ucili wali mu mubili wakwe, lelo amapalo yakwa Shikulu yali fumine pali ena.

57 Ifwe kuti twakwata ububumbo bwesu bonse. Kuti twakwata imishila yonse iya filonganino. Kuti twakwata amashina yesu mu mapepala namu fitabo. Lelo Nshishibe, ileelo, nga icalichi

caba Pentecosti ciminine pa cifulo cimo cine, na menso yabo aya tonkolwa ukufuma ku Cebo cakwa Lesa, naku mulandu untu Yesu afwililepo, untu bonse tufwile ukukwatila isenge pa Cebo ne fintu fyakwa Lesa.

⁵⁸ Ukusebana, eflyo ali, mukati ka nshita aikalilemo. Ilyo Ndemona Samsoni palya eminine, cishibilo, icishibilo ca ulwaawa, uluko ulwakoweshiwa mumibele, kabili icawa, ichalichi cakoweshiwa. Pantu, ena aleimininako fibili Israeli ngo luko, na maka yakwa Lesa, ayaba mu chalichi. Cine cine mukumona cali icabulanda, ilyo tule mumona palya eminine. Nakuba, ukumuleta panse palya, naka akalumendo kalemutungulula, kabili ukwabula amenso.

⁵⁹ Nga cakutila umulwani engalenga amenso yobe ukupofula ukufuma kucintu icituntulu icakwa Lesa, ukendafye pamuulu waciko nokukana ishiba. Nangu Lesa acite shani, no kucishininkisha ku Malembo Yawe, no kucishininkisha ku maka Yawe; amenso yobe nga tayaswike ku fintu fyakwa Lesa, ukapitapofye uwapofula nganshi.

⁶⁰ Kabili palya naiminina. Eico cilingile cali ninshita-yacipapusho, ilyo aba bashilika abakolelwe na banakashi, namatambula yakunwenamo mu minwe yabo. Naumfwa amashiwiw yatanuka mu miputule yonse, “Kanshi e Samsoni uyu, impalume yakwa Lesa, impalume ya bulamba, icita cikalamba,” ukwiminina mumusango ulya. Kuti na elenganya, ukupitila muli filya fita lintu baiminine na bakumbatila abatemwikwa babo aba Hollywood mupya, kabili nefyakusama fyabo ifyakoswa ifyabeka filepela, ba membela ba ici chalichi cikalamba icakwa Dagoni. Nde elenganya bamo muli bena kuti baibukisha, ukuti kwi shina yakwa Samsoni, ishina lyakwefye lyaleba tensha. Ishina lyakwe line lyaleleta—lyaleleta umwenso pali bena, pantu ali uwasubwa uwa kwa Lesa. Abengi muli bena bali ibukishe ico.

⁶¹ Abengi abashilika abaiminine palya, kuti baibukisha ukumumona naiminina nomubango wakwa kabalwe mu minwe, ikana ilya bena Pelishiti abafwa nabatambalala palya. Kuti cacitika shani? Lintu umubango wakwa kabalwe waletoba pali filya fisote, ifyali inchi-kabili-na-afu ukutikama, iya butale ubwakosa; cinshi, mwauma cilya icisote no mubango wakwa kabalwe, ulya mubango kuti watobeka mutupimfya amakana. Lelo Samsoni, namaka yakwa Lesa pali ena, aumine aba Pelishiti ikana, ukukontaula inkwela shabo nokushilambalika pama...nkasa shakwe. Kuti naelenganya abengi muli filya ifita ababutwike ilya nshita, baiminine kunuma pa muulu palya nokwibukisha. “Kabili e Samsoni uyu?”

⁶² Baibukishe ukumona umubango muminwe yakwe, nokutila, “Niani naumbi uulefwayako?” Ali mwaume uwalesosa. Ali

umwaume uwasubilwe na Lesa. Lesa alaile ukumupala. Ali mumaka yakwa Yehovah.

⁶³ Oh, takuli kutwishika pali abengi pano abengebukisha kunuma ilyo ichalichi caiminine mumaka yamusango ulya, lelo nomba fyonse nafyonaika. Umusango onse uwafilonganano, umo ukulwisha umubiye. Ukulongana kwakale ukwamapepo yabushiku bonse tayomfwika nakalya. Ukulongana kwamu misebo kwalipwililika. Babafye. Lelo, twalikwata ifikulwa, twalikwata ubutantiko, lelo alikwi Lesa wafisungusho? Mucine, abengi balakana Ico, nokukana ukuposha kwamaka yabu Lesa, abengi.

⁶⁴ Muno mwinefye mulici calo, Nakwete u—u wamu chalichi, ne chalichi icikalamba, atile. Nalefwaya ukusendako ifipuna, ukubika kuno ku Hot Springs, pa Armory ilyo Nali kuno, ine na Munyina Moore. Kabili umwaume wa Pentecosti atile, “Teti njeshe ukuleka...” Ena tansuminishe ukusenda ifipuna. Atile, “Teti nsuminishe uuli onse ukwikala pafipuna fyandi, uwacetekela mu bundapishi bwa Bulesa.” Ico tekunofye kweka; cilifye konse. Mulandu nshi? Bucaibela, mulandu wa bwafwilisho no tubungwe tumbi, ukulaba ukuti tuli bantu bakwa Lesa ku Bufyashi. Samusoni alabile ico, pamo. Kuti naibukisha...

⁶⁵ Ndeмона, ilyo acili naiminina palya, kwali bamo muli abo abaibukishe bulya ubushiku ku Gaza, ifyo umwaume kuti aimya impongolo shaku Gaza, ukushibika pamabeya yakwe, ilyo balefwaya beshe ukumwisalila mukati.

⁶⁶ Tekuti mwisalile ukusubwa kwakwa Lesa mukati. Takuli akabungwe akenga kwimika. Lesa apususha bena abo Aita. “Bonse abo Taata ampela bakesa.”

⁶⁷ Ukuba, bena batontonkenye naba mwisalila mukati. Kabili aimishe impongolo no kushibika pa mabeya yakwe, nokuya, aile pamuulu wa lupili nokwikala panshi. Impongolo ishikulu isha mukuba ishingana fina ukufika kuma tani, kabili u—u mwaume umunono ukushishula ukufuma mumabwe, ukushipeta nokushilambalika pakubeya kwakwe, nokwenda ukuninika ulupili nasho; lintu icili conse icaleiminina munshila yakwa Lesa.

⁶⁸ Abengi muli bena muli ilya mibele yakukolwa balibukishe ico palwakwa Samsoni. Lelo cinshi cacitika ileelo, tacitile? Samsoni Aliminine palya, lelo u Mupashi wakwa Shikulu tawaishile pali ena nakabili. Tasubilwe. Ena balimufulile aya amaka, ku mwanakashi uwa mubembeleke ukufuma ku Mafunde yakwa Shikulu.

⁶⁹ Ndetontonkanya, ileelo, nga tacili cimo nge nkuta shesu. Mwamona? *Umwanakashi*, muli Baibele, emininako “i chalichi.” Kabili ndetontonkanya nga cakuti tatukutike kukubembula kwa filonganano fimbi, ukwisha ukusambilisha ba kapyunga besu

muli bu—bu Bachelor of Arts degree, ukuti icilonganino cesu cingatila, “Kakumba wesu alikwata B.A., D.D., nangula L.D.” Ndetontokanya nga tatuobelwe mukusamwa ukukalamba, ukwasha ukukula ichalichi ici cilileko panono ba Methodisti atemwa ba Presbyteriani? Ifwe kuti catuwaminako ukuba muli missioni imo, no Mupashi wakwa Lesa pali ifwe, ukucila ukuba muli ii mibele. Katwishi ifwe ngata tuleisangukila ukufuma kuli cimo ukuya mu cinankwe, ukwasha ukupanga utubungwe twesu ukukula? Kabili tuli na, twalikwata ifikulwa ifikalamba, lelo u Mupashi wakwa Lesa uli kwi?

⁷⁰ Aiminine palya, uwafulwa ku mwanakashi. Cinshi calepita mu matontokanyo ya ulya mwaume ilyo aiminine palya? Alikwete inshita yakutontokanyapo.

⁷¹ Ndesubila ngakuti ichalichi cakwatako inshita nga ilya. Iyacilapo kuli imwe, naumbi million ukulundapo nangu ipaalo lyakwa Lesa ilyashika mu mweo wenu? Twalifwailisha . . .

⁷² Kabili kuli nafimbipo ifingi ifyo Nembele apa, palwa balya bashimucindikwa na pafyo Samusoni acitile, ifyo baletontokanya.

⁷³ Nomba natubwelele kuli Samusoni. Kabili finshi muletontokanya ifyalepita mu matontokanyo yakwe, palwa kucimfya ukwingi uko acitile, ifintu ifikalamba ifingi ifyo acitile ilyo u Mupashi wakwa Lesa wali pali ena? Lelo ena alishibe ukuti alikwete iminofu yonse, lelo u Mupashi wakwa Shikulu tapali.

⁷⁴ Lekeni mwebeko icintu cimo, mwe chalichi. Mwiesha kuilunda ku chalichi icaisamika nganshi, ibumba ilyakampukisha munsoso. Ikaleni na Kristu, uko u Mupashi wakwa Shikulu uli.

⁷⁵ Nomba afwile alitontokenye pakucimfya ukukalamba uko Lesa amupele, namunshita ilyo amenso yakwe yaiswike, icakuti alemona ubulayo bwakwa Lesa. Lelo nomba, apo ena naikatwa muli ici cintu, amenso yakwe naya tonkolwa.

⁷⁶ Abantu abengi saana, ileelo, balesendwa mu fyakwelenganya mumano yabo, tabatala kutontokanya uku fwayafwaya mu Malembo, ukumona nga cakuti cili icalungama atemwa tacili. Bambi besha ukusosa, “Tapali ubupusano nangu bumu.”

⁷⁷ Paulo, mu Milimo ya Batumwa 19, atontokenye ukuti nacipusana. Kabili atile, “Nga cakuti Malaika ukufuma ku Mwulu ashimikile icintu cimbi, lekeni Ena atipwe.” Mwamona? Mwamona? Cilalenga ubupusano.

⁷⁸ Nomba twamona Samsoni naiminina palya, ifyo aletontokanya pa fintu ifyo inshita imo acitile na maka ya Bufumu bwakwa Lesa. Kabili ifyo Lesa . . .Ena afililwe Lesa,

kabili afililwe abantu bakwa Lesa. Ee, mukwai. Nomba ena aba mufungwa wa luko lwine Lesa amwimishe ukonaula.

⁷⁹ Ndefwaya ukushingashingako apa pali mineti. ba Pentecosti, mwalishiba Nalimutemwa. Lintu Naishile kuli imwe, Jack Moore, Richard T. Reed, Munyina G. H. Brown, Munyina Ben Pemberton, na bambi abaume abakalamba, ukufwaya ukwishiba ifintu ifyo mwaikatilila, camoneke ukutila ifingi twakwete fimofine icakuti twali kwati likalapushi ilya linga ku minwe; Ni ninga bwino bwinofye naimwe. Ku Mbila, ukwabula ukwishiba ukuti kwabako ichalichi ulwa musango ifi, ico Nacetekelamo, kuno kwali libela ibumba lya bantu uku Ipokelela. Ine ncili fye Munyina Branham. Ncilifye munyinenwe, kabili Nali mutemwa.

⁸⁰ Lelo bushe muleiluka, icintu cimo cine ico Lesa amimishepo, imwe na mucimba kuli cena. Lesa amifumishe muli uto tubungwe, imyaka iyapitapo, mukulenga abantu muli imwe, kabili mwapilibwike no kubunganya icintu ico Lesa amifumishemo ukususha.

⁸¹ Ndeita umuntu uuli onse ukunanga pa ncende iili yonse mulyashi lyakale, ukutula apo ichalichi cabalile ukubungana, ico icali chalichi ca Roman Catholic, ku Laodikia, nangu Nikea, tutile, Roma, ilyo ichalichi ca Catholic ca ampana pano no kupanga akabungwe. Kabili efyacita ne chalichi conse ukutula pali Martin Luther, ulu lubali. . .

⁸² Lintu Lesa apele Martin Luther ubusokololo ubwa kulungamikwa; kabili, ilyo linefye Luther afuminepo, ba pangile akabungwe ukufuma muli cena, kabili cawile. Ukukonkapo kwaishile Wesley, panuma yakwe, na Asbury, nokutwalilila, bafumapo; bapangile akabungwe ukufuma muli cena, kabili cawile. Pakonkele Alexander Campbell, kabili cawile, na kabungwe. Pakonkele John Smith, uwa ba Baptisti, kabili cawile. Kabili lyonse ilyo umuntu atalile esha uku bunganya icintu cimo, icamibele yapangwa nomuntu, caliwire kabili tacatalile ukwima nakabili. Takwaba mulyashi lyakale, nangu kumo, uko ichalichi icili conse ica alile ukwampana, lelo kano caliwire, n bonse bawile, tabatalile abema nakabili.

⁸³ Abana ba Israeli, mu cipasho, bali no kukonka i Ntumba ya Mulilo. Kabili cila bushiku bafwile ukuba aba iteyanya, tekwampana nokwikala apa, lelo ukwenda pamo no Mulilo.

⁸⁴ Ifyo efyo Lesa afwaya abantu Bakwe ukucita, endeni pamo no Mupashi, endeni pamo nenshita!

⁸⁵ Mwatila, “Ukuba, Munyina Branham, twalikwata imfula shamusango onse, nemfula sha mukati ne mfula ya kunse.” Mwalikwata amano. Nshile sakamana buli umusango shani ubusokololo, kabili nangu bumoneke shani bwino, ngacakuti tabuli ukulingana ne Cebo cakwa Lesa, bulekeni bube. Ici emafunde yakupitila mumatololo, i Cebo cakwa Shikulu.

⁸⁶ Lelo ichalichi iciminine apa ileelo, i chalichi ca Pentecosti, mutubungwe nalimo amakumi yabili nangu amakumi yatatu utwa pusanapusana, cila kamo kaleita akabiye, *ici, cilya, ne cibiye*, “ulupanda lwa makubi,” na fimbi po. Wemusebanya, lintu icintu cine ico Lesa amutintilepo ukufuma mulya mufilonganino, mwa lipilibuka nokucita icintu cimo cine ico bena bacitile. Ifyo fine eflyo Samsoni acitile. Lesa aimishe Samsoni ukonaula uluko. Kabili Lesa aimishe imwe kubantu, tekabungwe.

⁸⁷ Lelo ilyo Lesa aimishe Israeli ukufuma ku...ukufuma ku Egypto, balifye nalimo ne nshiku ikumi isha lwendo ukufika kucalo cabulayo, nalimo ba mailoshi amakumi yane. Lelo baikele mu matololo pa myaka amakumi yane. Mulandunshi? Ukusenamina kwabapele umwana wa mpanga pa membu shabo, ukusebululwa nge cishibilo, i Ntumba ya Mulilo nga inte, Mose nga kasesema. Ukusenamina kwapele fyonse ifyo balekabila, lelo bena balefwaya icintu icakucita pa lwabo.

⁸⁸ Bena tabaishibe, ilyo Miriamu aleshana necisekese, nabana ba Israeli bareshana pamo nankwe, na Mose aleimba mu Mupashi, balifye ne nshiku ikumi ukufika ku ncende ya bulayo ubwapwililika. Tabaishibe, imyaka amakumi yane, kabili ne mibili yabo tayali nokubola mumatololo. Cinshi calengele ifyo? Israeli apangile icilubo nganshi mukusala batalile abacita, ilyo basuminishe amafunde mucifulo caluse, lintu balefwaya ukuipangila ba bishopu nefintu fyabo palwabo, icintu cimo bena bali no kucitamo. Lesa ali pakati kabo, alebatungulula.

⁸⁹ Ecimo cinefye nefyo ba Pentecosti bacitile. Lintu Lesa asokolwele icintu cimo icipya mu Malemo, bena baleciita imilandu imo iipya nangu conse ico mungatemwa ukucita palico. Lelo lintu Lesa asokolwele icintu cimo, munshita yakupokelela Icishinka no kucesa Cena na Baibele, bafuminemo no kupanga akabungwe, baipatula abene. Kabili pakonkele *ici, cilya, ne cibiye*, kabili nomba mwiminine aba koweshiwa, ichalichi ca Pentecosti, icakakililwa mu minyololo ya tubungwe. Icintu ico Lesa amwimishepo ukonaula, kabili nomba na mubunganishiwa nga fintu bena bali. Abaume bakwa Lesa muli cila kamo, nabanakashi; ico cishinka, muli cila kamo.

⁹⁰ Kabili ifwe, cila umu, ali nomulandu. Impoto tekuti yebe iketulo ukufita. Bonse tuli nomulandu, cila umu muli ifwe, imwe ba oneness, twoness, threeness, na—na conse ico mungaba. Wemusebanya! Wekusebana kuntu mwaleta pali Yesu Kristu! Wekusebana kwi shina lya pentecosti! Balileta saana umusebanya icakuti caba pepifye, ishina lya musebanya. Abantu tabafwaya nangu panono ukwampana ne shina lya musango uyu. Nipamulandu wakuti mwacitile icintu tamufwile ukucita. Kabili ukutwalilila uku konka amafunde yakwa Shikulu, cifwile caba ukwampana ukukalamba ukwakwa Lesa, ukutwalilila ukwenda ku kucimfya, ileelo.

91 Ena alekele umwanakashi ukumubembula ukufuma ku Cebo cakwa Lesa, nomba ena eminine alecitila ciwa amangalo. Ico nacilungama. Ifyofine fye.

92 Cintu cimo cine icilecitika ileelo, ukuleka Yesebeli, “nyina wabacilende.” Ukusokolola 17 pa lesosa ukuti ena ali “nyina wabacilende.” Nomba, ngacakuti ena ni cilende, uyo ni—uyo mwanakashi uushikala bucishinka ku mulume wakwe. Ena aitunga Kristu ukuba Umulume wakwe, elyo tekalila mu Mafunde Yakwe.

93 Kabili cinshi ama chalichi yambi yalecita? Cilende ni ani? Cintu cimocine ne cibiye. Cinshi ico? Ubulalelale ku Cebo cakwa Lesa. Kabili ena ali “nyina wabacilende.” Kabili ukuleka lilya isambilisho lyakwa Yesebeli, na fimbipo, kumulandu webumba lya baume abasambilila, abalefwaya ukukumana no kubunganya icintu cimo pakuti bengakwata amashina ayalumbuka abene. Kabili i chalichi ico iciminine apo, ubwananyina ubwapatukana. Oh, we, we kusebana muno cungulo!

94 Ifyo cili icintu icibi, ukupofula mu mupashi. “Oh,” mwatila, “ukuba, Nshili mpofu ku mupashi.” Imicitile ilalandikishapo ukucila amashiwi; cishininkisha ukuti muli mpofu kufyo mule ipununa pa fintu. Mwamona?

95 Nomba, ibukisheni, uyu tepu alepangwa kabili akatumwa ukushinguluka isonde. Mwamona, kabili Nshile sosafye pano, lelo yalaya ukufika na pamo ku fyalo ikumi limo na cinelubali ifya pusana pusana, kunse mu mpanga nencende konse konse.

96 Impofu kumupashi! Impofu kunshi? I Cebo cakwa Lesa, icishinka cakwa Lesa. I cilonganino cenu tacakamuleke . . .

97 Bakapyunga abasuma balesa kuli ine, no kutila, “Nalicetekela ico ukuba i Cishinka, Munyina Branham, lelo nga Nashimikile Ico . . .” Aleni, nomba. “Nga cakuti Nacetekele Ico, ukuba, abantu kuti . . .”

98 Nshile sakamana nefyo abantu basosa, Nshile sakamana nefyo akabungwe kasosa; fintu Lesa asosele ukuba i Cishinka. Kabili nga cakutula Cishinka cakwa Lesa, Lesa aka citungilila. Kuti mwakabila shani ukukwata icicetekelo ilyo mufwaya ubucindami umo ku mubiye? Mwamona, cilafumyapo icicetekelo pali imwe.

99 Babwelele ku filonganino, Pentecosti ulya uwafyelwe ukufuma mu cilonganino. Pentecosti tafyelwe mu cilonganino; ena afyelwe *ukufuma* mu cilonganino. Kabili ubucenjeshi bwakwa Satana bwa mutintile ukumubwesha muli cena, umo muntu afumine, “Nga fintu kapoli abwelela ku matipa yakwe, ne mbwa ibwelela kumalushi yaiko.” Nomba balolesheni, abacimfiwa!

¹⁰⁰ Ifwe tufwile ukuba kale mulya mu ncende yabulayo. Yesu Kristu afwile ukwiminina nganshi pakati kesu, i cakuti tekuti pabe ubulwele nangu bumo. Oh, kuti caba ica bukata.

¹⁰¹ Tapafwile paba abanakashi baputulwa umushishi, abafwala-ndeleshi ishipe. Kabili—kabili tacifwile caba umwaume awaupa imiku itatu nangu iine, ba dikoni mu chalichi cesu. Kabili mwinjeba ukutiila ta caba mu Pentecosti; icine cine emo caba. Lelo ni pa mulandu wa bucindami pa bantu. Tacifwile ukuba ifyo, lelo efyo cili. Cinshi? Mulandu waku cebushiwa kwa ku filonganino, ifikansa fya calo, indalama, mucifulo cakuba pamo ne Cebo. Ukufumyapo munyina umo umusuma, nokubikapo umuntu umbi pantu wena aba uwalumbuka sana mu musumba.

¹⁰² Ndefwaya umwaume uwa lumbuka mu Bukata. Nga cakuti ena taishiba ba ABC bakwe, bupusanonshi cile panga? Bushe mwalishiba ico ABC imininako? Lyonse ulecetekela Kristu. Ico nacilungama. Sambilileni ico.

¹⁰³ Umwaume umo acisa kuli ine, tekale sana, nokutila, “Munyina Branham,” uuli nganshi. . . umo uwaishibikwa sana mucalo muli bakapyunga bamu Pentecosti. Ena acinsenda ku muputule wakwe, acitiila, “Ndefwaya nkupepeleko.”

Nacitila, “Nshili mulwele.”

Acitila, “Na—Nalikutemwa.”

Nacitila, “Ico cilomfwika kuli bonse.”

¹⁰⁴ Acitila, acinjeba, ukuti, “Cinshi ico iwe taulekela ukweba abanakashi pa lwa mishishi yabo iya putulwa na fimbi fyonse ifi ifyaba ngefyo, napa lwa chalichi?” Acitila, “Uyo temulimo obe.”

Nacitila, “Wakwa nani wena nomba?”

¹⁰⁵ Acitila, “Cikesaba icakuti tawakakwate nelyo cimo kano umwina wa ncheshi uwakushimikilako.”

¹⁰⁶ Nacitila, “Ine kuti natemwa ukucita ico no kushimika Icline, ukucila ukusuminishanya na kasebanya.” Mwamona? Mwamona?

¹⁰⁷ Acitila—ukuti—ukuti—ukuti, “Munyina Branham, bushe Lesa takwitile ukupepelela abalwele?”

Kabili Nacitila, “Ee, mukwai.”

Acitila, “Abantu balicetekele iwe ukuba kasesema.”

Kabili Naine nacitila, “Ukuba, ico—ico, Nshatala ncisosa.”

¹⁰⁸ Acitila, “Lelo bena bacetekela iwe muli uyo musango.” Kabili acitila, “Ngacakutila uli kasesema, cinshi tauposela inshita mukufunda abantu ifya bupe fya mupashi, nefya kundapa abalwele, ne—ne fya kucita ifi, ukupokelela ifya bupe fya mupashi, nokwafwilisha ichalichi mucifulo caku laiminina lyonse, ukula ebaula abanakashi, nokula ebaula abaume, ne fintu fyaba ngefyo?” Acitila, “Ukuba, cinshi teti ubaleke abene?”

Acitila, “Cinshi teti ubafundishishe icintu cimo icikalamba ukucila pa mishishi iya putulwa na fimbi, no kubaleka abene?”

¹⁰⁹ Nacitila, “Kuti Nabafunda shaniinsamushi shafishibilo nefilembo lintu bena tabaishiba nangu niba ABC babo? Ico nacilungama. Lekeneni bena basambilile ba ABC babo pakubala.”

¹¹⁰ Kapyunga umukote aile no kushimikila pa kulungamikwa pa musonkano wa kupuputulwa, ubushiku ubwalenga shibili, ubushiku ubwalenga shitatu, ubushiku ubwalenga shine, ubushiku bwalenga shisano. Ba dikoni balimwitile, nokutila, “Reverend, tawaishiba ukucila pambila ya kulungamikwa?”

¹¹¹ “Oh, cacine. Lelo lekeni bena babale ukulungamikwa, na lyene tukashimikila ifintu fimbi.” Ico nacilungama.

¹¹² Oh, nga kuti mwabwelelafye ku mufula! Samsoni aiminine Palya, uwacimfiwa.

¹¹³ Nomba moneni, ifwe kuti twaba aba embelako, ico kuti caba ifyo. Lelo cili kwati nga fintu Naleisa mu musebo ubushiku ubwafumako, Namwene icishibisho icikalamba, catile, “Iya kwa Funk, amataba yasakanishiwa,” ifyo yali iikulu. Lelo tayakwete ubusuma nangu bumo. Yena tayakwete ubusuma ubo yali noku kwata, kabili yena ileipaya icalo. Mwali belengele pali ico, muli Reader’s Digest, “Ngacakuti abanakashi batwalilila ukulya inama na mataba ayasakanishiwa, na fimbipo, tabakafyale i myaka amakumi yabili ukufuma nomba.” Tamuli busuma muli cena.

¹¹⁴ Icasakanishiwa nicinshi, icilimwa camu cikopo? Ngacakutila cena tacili cilimwa icituntulu, lyonse mufwile ukula cifuminisha, ukutalushako utushishi kuli cena. Utushishi kuti twa cilya. Lelo nga cilimwa icituntulu, tamufwile ukula cifuminisha. Icilimwa ica bumi ubusuma, akashishi teti kende pali cena.

¹¹⁵ Ubo e bwafya, imwe kano muletentemba abantu mu chalichi, “Ubukata kuli Lesa, nkashi,” mwamona. Iwe wali sakanishiwamo, iwe waletwamo munshila imbi.

¹¹⁶ Sendeni lulya ulubuto ulwasakanishiwa no kulu byala nakabili, kabili cinshi mwa sanga? Nangu cimo. Tacacitefyeye nangu cimo.

¹¹⁷ I chalichi naci yemba ileelo, ico cishinka, ifikulwa ifikulu ifyo mwatala kwata, inkuta ishikalamba isho tamwatala amushimikilako, ba kapyunga abasambilishiwa ukucila abo mwakwete. Mwalekwata umwaume uwakuti afuma mu mabala ya mataba ku ncende kumo, abo Lesa aleita mwibala lya fi futi. Lelo imwe nomba mwali tuma abana benu ku sukulu, noku pangamo abenshikulu ukufuma muli bena, kabili babwela na ba Ph.D, na LL.D. Kabili nangufye niciimo ichalichi cikalamba icaba Pentecosti ileelo, ilyo tabalatuma umuntu mu mabala yabu missioni, ena afwile aiminina ku cinso cakwa shing’anga

wakwishiba ifyo bongo bongo ukumona nga cakuti ena alifikapo mukulinga na mano. Tontonkanyenipo!

¹¹⁸ Mu Pentecosti, tacalefwaikwa ukweshiwa kwa bongo bongo, kwali kweshiwa kwa Mupashi wa Mushilo uwaikile pa Bushiku bwa Pentecosti. Ico cili kunse yalipusho ku bantu ileelo.

¹¹⁹ Bushe mwalishiba ichalichi ca Katolika waci Roma ecali ichalichi caba Pentecosti wakubalilapo? Calu sendela imyaka amakana yabili ukuba mumibele cilimo ileelo. Nga cakutila aka kabungwe ka Pentecosti katwalilila imyaka naimbi amakumi yasano, kaka bipishapo ukucila ne chalichi ca Katolika. Ico nacilungama. Ulubembu luli umwiina kumbali shonse! Nomba limbi teti mutontonkanye ukuti Ine...Imwe kuti mwatontonkanya ukuti Nimfulungana, lelo Nijishiba apo Ndi. Mwamona? Kabili cishinka. Imwe lolelenifye kabili mukasanga. Ee.

¹²⁰ Ulwa sakanishiwa, amataba yakanishiwa, ukulalenga abanakashi ukuba abacepa intungu nokukula ifipeya, nafimbipo.

¹²¹ Ukusanduluka kwaletweba ukuti, mu kusanduluka, ukuti inama shimo shalekumana pamo no kufyala icintu cimo icaibela, na cimbi icintu icaibela, cena caisa fika naku muntu. Batwalilile ukufwayafwaya mpaka basusha ukulanda kwabo.

¹²² Leken i mwebeko icintu cimo, imwe mwe balimi muno. Cinshi cilenga kwaba impongolo? Yena e nama iyalubana nganshi mwi sonde. Yena yalisakanishiwa. Yena tayakwata amano, icakubalilapo. Tekuti uyifunde nangu cimo. Yena ikalolela mubumi bwaiko bonse, ukufika paku kupanta ilyo tailati ifwe. Tekuti uyebe nangu cimo. Cinshi ico? Pantu yena yalisakanishiwa.

¹²³ Chanjibukishafye pabena Kristu bamo aba tobenkanishiwa, abetwa ifyo. Kuti waesha ukweba mpongolo umukote icintu cimo, ena kwiminina na pakalika na matwi yakwe, kabiye, “Haw! Haw! Haw!” Mwamona? Ena ifyo aishibafye kulila ne fyakucitacita. Tekuti mu mwebwe icishinka nangu ukumufunda cimo. Ifyo efyo aba bantu baba. Bebeni pa lwakwa Kristu, umo wine mailo, ileelo, no muyayaya, “Haw! Haw! Inshiku sha fisungusho shalipita,” ukulila kwa ba seminali bamo abo twasambilile. Cena calisakanishiwa.

¹²⁴ U Mupashi wa Mushilo ali no kwankula kwifunde lyonse ilya kwa Lesa na “ameni.” Ico mupashi-waseminali icintu cimo icileputwa ukufuma muli ena. Tekulila ukutalikana ne Cebo cakwa Lesa, ngacakutila ni Mupashi wa Mushilo. Uli nokwankula na “ameni.” Mwamona?

¹²⁵ Namwishiba, Ine ndetontonkanya impongolo tayaishiba. Lelo namwishiba ukuti? Yena tekuti ilande wishi waiko ninani nangu nyina waiko ninani. Mwamona, wishu ali ni punda

munono, nyina wakwe ali nikabalwe umukota, lelo teti aifyale nakabili. Ena calipwa.

¹²⁶ Icilimwa teti ciisandulule nakabili. Wabula icama kumbi yabutulukila necama kumbi makumbi yabutulukila, kuti caleta ica kashikilila icabutulukila; cibyale imiku ibili nangu itatu, cikesabwelela icabuta nangu icakashikilila, mwamona.

¹²⁷ Ico cishininkisha, mwamona, tefyo fisa ifyo. Lesa atiile, “Leken i icintu conse cifyale ukulingana nol ubuto lwa ciko,” kabili ifyo efyo cifwile ukubelelela. Umuntu alengelwe mu cipasho cakwa Lesa, te kolwe. Mwamona? Ifyo fintu fyaupuba!

Moneni, mwalishiba, ukukana ishiba kwakwa mpongolo. Lelo namwishiba? Teti mu mwebe nangu cimo. Ena alikosa umutwe.

¹²⁸ Lelo Ndetontonkanya kabalwe umwine mwine uwasandululwa, oh, owe, ena alishiba nyina wakwe ifyo ali, ifyo wishi ali. Ena bufyashi bwafuma kufikolwe. Ena alishiba bonse bawishi kulu na fyonse, pantu ena alikwata ifikolwe fyaishibikwa.

¹²⁹ Efyo caba kuli aba aba tobenkanishiwa, abetwa abena Kristu. “Inshiku sha fisungusho shalipita. Ukuba, ifwe ba Presbyterian, ifwe ba Methodist, ifwe ba *wakuti-na-wakuti*, tatwa cetekela *Ici*. Ifwe fweba Sumina ba lesa patatu, ifwe ba *wakuti-na-wakuti*, ifwe tatucita. Ifwe tatucita *ici*.” Mwamona, tamwaishiba apo imwe mwaiminina.

¹³⁰ Lelo umwinemwine ufyalwa cipyacipya uwaishiba ifikolwe fyakwe ifyabwina bwina Kristu ukufuma mwi Buuku Iya Milimo ya batumwa, alishiba bwino bwino apo aiminina. Ene afyalwa ku Mupashi, kabili *ubu* ebufyashi bwakwe ubwa fikolwe fyakwe. Afuma ku musambo wakwa Lesa. Cili cena nokucita cimocine nshita yonse.

¹³¹ Emulandu wine, ichalichi cili icayembelako. Lelo bwafya nshi? Cena calibulisha u Mupashi. Lwali ipwisha ulwine, ne sonde. Ukusuminisha abanakashi ukufwala utuputula. Ukulisha ifinanda, ukuba suminisha ukuipenta. Ukusuminisha abaume ukupa imiku ine nangula isano, nokusunga incende shabo, ififulo. Fyonse ifi fintu ifyo bapitamo, fyabafye bwino bwino nefyo a Malembo yasosa. Cena cabafye ica cimfiwa nga fintu Samsoni ali. Ifyo finefy. Ee, mukwai.

¹³² Oh, ngafintu Samsone atontonkenye! Ine kuti...Nshi lefwaya ukumiteka inshita ikalamba; Nala cililapo fimo mufilembelwe apa. Nga fintu Samsone ali nokwiminina palya no kutontonkanya pa cilubo cakwe, kabili napa afwile ukuba!

¹³³ Ibukisheni Israeli. Kuti Naba, njelelako pakashita akanono, ukubwelela kunuma kuli Israeli? Bushe namwishiba, cinshi ico bacitile mu myaka amakumi yane lintu bapangile akabungwe kabo mulya? Mucifulo cakupita nokuya, ukutungululwa ne

Ntumba ya Mulilo, Malaika uwakwa Shikulu, uyo uwali ni Kristu, mucifulo cakupita nokuya kabili nokumukonka Ena. Mu nshiku nangu ikumi limo, isho bali mu bulayo ubwapwililika. Lelo namwishiba ukuti, “Baendawike mu matololo,” Baibele eflyo yasosa.

¹³⁴ Baishe fika pa Kadesh-barnea, ico icali icipuna cabupingushi, kabili palya lintu inengu sha bwelele nokulanda palwa calo cilya. Batiile, “Teti tucicite.”

¹³⁵ Kalebu na Yoshua batiile, “Ifwe natu natu cilapo ukucita ico,” pantu bena balelolesha kubulayo bwakwa Lesa, tefintu imibebe yali.

¹³⁶ “Teti tukwate ichalichi ukwabula akabungwe.” Ukuba, imwe tamulemona ico Lesa alandile. Ico nacilungama.

¹³⁷ Cinshi ico bacitile? Bushe Lesa ali bapalile? Icine cine, icine cine. Bena baendawike. Baupile abakashi. Bena balimine amabala ya mwangashi. Kabili bakwete na abana, nokufula bena bafulile. Kabili bacitile icisuma mu matololo. Ico nacilungama. Lelo nangu cibe ifyo tabali mumapalo ayapwililika.

¹³⁸ Eico lintu bonse abo abapangile ili ibumba ilikalamba ilya kabungwe, “bakalwa bakale” kena kaitilwe, cisuma, Lesa abalekele bena ukwikala mulya mwine mpaka onse umuntu afwile. Kabili nomba Atampile ne nkulo iipya, pe samba lya butungulushi bwakwa Yoshua, uwacetekele i Cebo, ameni, kabili abatwele ku calo cabulayo.

¹³⁹ O mwe Lesa, lekeni iyi nkulo inono iyaba Pentecosti ikwate ici—ikwate icimonwa. Mwamona, batwalilile ukuya cabulayo. Tufwile ukukwata imisango yonse iyafyabupe ifyabupe fyakwa Lesa.

¹⁴⁰ Ifwe twalandile mu ndimi. Ico nacilungama. Ico cili bwino. Tapali icakulwisha ico. Mose a yabwike Bemba wa Kashika; umulwani aipaiwe ku numa yakwe. Tu—tu—tu letasha ico. Lelo ico tacili conse.

¹⁴¹ Ifyo ba shinwe naba nyinenwe tabatontonkenye panono ilyo baiminine palya nokula lisha imfuti shinono ukupitila pama windo, nabena ukulashanina mu Mupashi, ukuti abana babo bengesa kuli ici? Lelo eflyo cali.

¹⁴² Lelo kuli inkulo iipya ileisa nomba. Umushishi wakwa Samsoni walikulile. Mwamona?

¹⁴³ Moneni! Tamufwile mwaleka Delila uku mikobenkanya ukubwelela mu cintu cimo nga cilya. Uh-huh. Talukeniko kuli cena. Ico ecintu icamutipile. Mwa kushiwa uku susha cena. Kabili na Ine nalyesha nganshi ukucita ico, nangu Naiminina neka. Lelo Na lyesha nganshi ukwiminina ku Mafunde yakwa Lesa. Ndemona ichalichi naciminina palya,

nacifumishiwapo amaka yakwa Lesa, nacifumishiwapo amapalo, nacifumishiwapo ifyabupe.

¹⁴⁴ Kabili Lesa ali noku pongolola ica bupe Cakwe. Batila batila, “Ico kubelenga amatontonkanyo, ukwishiba amano ya muntu,” lintu bena bafwile ukupokelela Ico. Mwamona? “Ukuba, ena ali palya pali ba Oneness nomba. Iyoo, ico nomba cili, cifwile ukuba, ku, oh, bali *ifi, filya*, nangu *bambi*.” Mwamona? Oh, nga cakuti imwe mwaishibe fye ubushiku bweni! Mwileka Cena ukupitilila imwe. Iyi e nshita, iya kwikatana muli Kristu. Moneni.

¹⁴⁵ Samsoni aiminina palya, aletontonkanya pacilubo cakwe, pafintu ifyo acitile. Nomba bushe namwiluka icalengele ena ukuba mu musango ulya? Abalwani bali mutonkwele amenso.

¹⁴⁶ Kabili ico e cintu icakubalilapo ico akabungwe kali nokucita, kutonkola amenso yenu kwi senge ilili lyonse kanofye abo abenu. Ameni. Kuti Nalanda ifintu ifingu palya pene, lelo Ine—Ine nshacite ico. Lelo imwe, nga muli aba mano yabu mupashi, namwishiba ico Ndelandapo. Cena cili noku tonkola amenso yenu! Imwefye ne bumba lyenu; nga cakuti muli ba Methodisti, imwe mulifye ba Methodisti; nga cakuti muli ba Baptisti, mulifye ba Baptisti. Nga cakuti muli ba Presbyteriani, muli. . . Nga cakuti muli ba Oneness, nga cakuti muli ba Twoness, nga cakuti muli ba Threeness, nangu na bambi po abo bakwata, mwamona, imwe mwabafye ifyo fine. “Abashalako tababa abasuma.”

¹⁴⁷ Ba Baptisti balikwete imilandile mu nshiku shakubalilapo ishakwa Billy Graham, amakumi yane- . . . “Mu ’44, milioni imo ukucilapo.” Cinshi mwa sangilemo? Ibumba lya ba kapepa wafwaka, bakailunda-baku chalichi ba myalu myalu.

¹⁴⁸ Lintu Billy, palwakwe, lintu Nali kumulalilo wakwe, atile, “Namwishiba icilengele cinshi?” Atile, “Apa epali icakumwenako ici.” Atile, “Nalaingila mukati. . .” Atile, “Paulo uwa Shila aingile mu musumba, akwete umusambi umo. Kabili abweleleko, panuma ya mwaka,” kabili atile, “ulya umusambi umo aletele na bambipo amakumi yatatu.” Atile, “Ndeingila mumusumba pamilungu mutanda, nokusanga abasala amakana amakumi yatatu, kabili Ndi nokubwela mu myeshi mutanda kabili nokukana sangapo amakumi yatatu.” [Tapali mashwiwi pa tepu—Kale.]

¹⁴⁹ Ukuba, nomba, Natemenwe uyu muntu pakushipa kwakwe, lelo kuti Natemwa uku mwipusha ilipusho limo. “Ninani uwasendele abasambi bakwa Paulo? Ni kakumba nshi uwa bunang’ani pali ena?” Cali nicinshi? Paulo aikele pamo nankwe mpaka ali bwino bwino umwana wakwa Lesa, uwa fyalwa ku Mupashi. Ena amukushishe sana muli Kristu icakuti afililwe nokulolesha kunuma.

¹⁵⁰ Bena bsliminefye nokuya ikumanisha ku chalichi, nangu ukulalandila mundimi. Nacetekela ukulandila mu ndimi. Nacetekela ukutila Mupashi wa Mushilo alandila mu ndimi. Lelo Nalishiba ukuti bonse abalanda mu ndimi tabakwata Mupashi wa Mushilo. Mwamona? Nalimona ba shing'anga ukulandila mu ndimi, nokulanwa umulopa mucipanga camutwe wamuntu, nokwita pali ciwa, ukulandila mundimi nokwalula ico. Ico teca kumfwikishiwa cine cine. Iyo, iyo. U Mweo wakwa Kristu muli iwe, icisabo ukuipela ubunte icine, ifyo efyo cili. Lelo ifwe twikalila pali cilya, “Nga cakutila umuntu alandila mu ndimi, epela, lekeni ena engile.” Moneni ifyo mukwete ileelo. Mwamona? Ico ecine, ukulandila mu ndimi, lelo te Cishinka conse.

¹⁵¹ Kwati muntu wafita alelya icipimfya cacibilika. Atile, “Bushe nau citemwa, Mose?” Atile, “Cilya caciwama, wemu kalamba, lelo icine cine kuliko nafimbipo.”

¹⁵² Nga cakuti kuti Nalandila mundimi, icine cine kuli nafimbi ukucilapo pali Ico. Mwamona? Lelo finshi ifwe tu cita? Pamo kwatifye nga Israeli, aiminine pali ico icintu cimo, kabili nokwendauka mu matololo pamyaka amakumi yane, ukwabula bambi ukwingila Mulya mu calo cabulayo. Ico eco naifwe twacita.

¹⁵³ Samsoni aiminina palya, (Mfwile na angufyanya), nga nacilolesha kunuma, nokutontokanya pali ifyo fyonse. Kabili ali, ewali umulandu uwine wine ena akushiwe, akuba impofu. Kabili umubili wakwe uukalamba, kabili nokwampana kwamubili wakwe uukalamba, ubukulu bwamubili ubwaiminine palya, neminofu yakwe iikalamba nganshi, lelo tamwali amaka.

¹⁵⁴ Pano twiminine ileelo. Kunuma ilintu ba Pentecosti balebafye abengi, nalimo imyanda ine nangu imyanda isano iya bantu ukuya mucalo conse, ileelo e chalichi cikulile bwangu mwi sonde. Cinshi tuleingilamo? Ibumba lyaba membala. Ukulingana ne fikulwa fyesu ifikalamba, tufwile twaba imiku amakana amakumi ikumi abakulilako ukucila lintu twatampile. Kabili tuli abanakilako imiku amakana ikumi ukulingana na lintu twatendeke, pantu tule kuula pa—pa mufula wabula impela, pa kabungwe, icintu cimo ico Lesa atiipa. Kabili kuti twa kula shani i—i chalichi pafyapya ifya mu Sodoma na Gomorrah?

¹⁵⁵ Nde subila tamwampate, lelo ikaleni tondolo pali mineti nokukutika. Mwamona?

¹⁵⁶ Ena tekuti acicite. Ico Lesa atiipa, Ena alitiipa. Nomba, ntalusheni ku cintu icili conse ico Lesa atiipa. Ine ndefwaya ico Ena alepala. Ico nacilungama.

¹⁵⁷ Moneni ilyo ali naiminina palya, aletontokanya. Aba kalamba bafita, nabakolwa citika, nabeminina palya, “Ine ndeibukisha ulya muntu umukalamba. Ndeibukisha lintu

aiminine nencendwa ya—yampongolo, mukuboko kwakwe. Ndeibukisha lintu apetele impongolo sha ku Gaza nokwenda ukunina pamulu walupili. Ndeibukisha ifintu fyonse ifi. Lintu inkalamo ya mubulumine, kalya akantu kamubili uunono, kabili Mupashi aishile pali ena, naena alepwifeye ilya inkalamo mufibili, nokuboko kwakwe. Kabili uyu eminine apa, nakakwa, nakaice akanono kalemutungulula monse. Kabili na lesa wesu, Dagoni lesa-isabi, na cimfya pali ena.”

¹⁵⁸ Mwamona imwe. Isonde nalisokelela mu chalichi, nalicimfya. Nalifuula abanakashi besu. Lyena nalibika ukukabila mu mitima ya bantu ukwa kwikala mumayanda nokutamba ifitunshi tunshi mucifulo cakuya ku chalichi na kukukumana kwa mapepo. Ukutemwa kwe sonde nakusokelelamo no kusenda ichalichi cesu icaba Pentecosti ukulola-kumbo.

¹⁵⁹ Uku kabila ne cicetekelo? Fipisha umuntu mu mulongo wa mapepo nokumuleka amone conse icalacitika; ubushiku ubwakonkapo, abo babwela na kabili. Ulubuto lwa kwa Abrahamu? Ici cicetekelo tacilipo palya. Cifwile ukubapo, lelo ta cilipo. Lintu imwe. . .

¹⁶⁰ Lesa aebele Abrahamu umuku umo, na pa myaka amakumi yabili naisano alelolala palico. Temulandu nangu caposele nshita, kuti Ine namumfwa aleti kuli Sarah, “Kabiye kulya, uli ne myaka amakumi mutanda naisano. Kabiye kashite inshindano yakupikwilako, kabili ushiteko nabanapini upikule utusokoshi. Tuli nokukwata umwana.”

“Wishibe shani ukuti muli nokumukwata?”

“Lesa asosele ifyo.” Kabili cili ifyo fine.

¹⁶¹ Ica kubalilapo, mwamona, ena alicililepo napa bufyashi imyaka amakumi yabili. Aikele nankwe ukutula ilyo ali mupepi nemyaka ikumi limo na mutanda iya kufyalwa, ngo mulumendo. Tacalengelepo ubupusano ubuli bonse; taloleshe pali ico; tatontonkenye ico. Atontonkanye pafyo Lesa asosele. Aipatwile umwine ukufuma ku kukana cetekela conse, aile mulya mu matololo.

¹⁶² Ubo ebwafya ileelo. Mulefwaya ukuipangila na kabungwe kakukana cetekela, mucifulo caku ipatulula mwebene ukufuma ku fintu fye sonde; mulefwaya mumone ifyo mwi nganina mupepi ukuya kumpela ya lubembu. Ukumona ifyo mwinga talukako apatali ukufumako kuli lwena.

¹⁶³ Lelo bena pano epobaali. Inshiku shakubalilapo amakumi yatatu nangu inshiku amakumi yabili na cine conse conse shapitile. Libumba ilya tobenkana nombamba, kabili imwe mwe bakalamba na mwishiba ico Ndelandapo. “Sara, we mutemwikwa, uleumfwa shani?”

“Tapali ubupusano nakalya, Abrahamu.”

“Ubukata kuli Lesa, tuli nokukwata, nangu cibe fyo.”

“Waishiba shani?”

“Lesa eflyo asosa.”

164 Imyaka ikumi yapita. “Sunga ba napini palya, ne nshindano shonse ishakupikwilako.”

165 Bamo pabanankwe bapitilapo, “Abrahamu, wishi wa nko, uli nabana banga?”

166 “Ubukata kuli Lesa! Pali ino nshita, nangu umo, lelo Ndinokuba kwata.”

“Musango nshi, iwe? Cinshi, uli nemyaka amakumi pabula iyakufyalwa.”

167 “Tacilelenga ubupusano nangu panono. Cikaba icisungusho icikalamba ukucilapo nomba ukucila ifyo cali nokuba nga acicitika kunuma imyaka amakumi yabili yapitapo.”

168 Lelo, ileelo, “Nali pepelelwa mailo ubushiku. Nshile umfwilako bwino ileelo.” Ulubuto lwakwa Abrahamu?

169 Ubwafya nicinshi? Imwe nabami fuulwa. Imishipa yenu iya chalichi epo icili; akabungwe kenu kacili aka kalamba nga kaba Methodisti nangu aka ba Baptisti. Mule kuula kuli iyi mishipa iyi inshita yonse, lelo cili kwi cilya icicetekelo cinecine? Oh, mulatota indupi shenu, mulapunda nokwimba inyimbo, nokucinda. Owe, Nalimona ico ukucitika muli ba dokota abengi, mu kukumana kwaba shing’anga, uku bamona baletota indupi shabo, nokulandila mu ndimi, ukwalula, nokulatolauka pamuulu-na-pesamba. Taata wa Mushilo akwata cimo cine. Ico teco Ndelandapo.

170 Ndelanda palwa icicetekelo icinecine icinga fungulula ubulayo bwa kwa Lesa, nokwiminina palya ukucilenga ukuba ica mweo, icintu ica mu Malembo.

171 Abekwa Mohammed, Nalibamona ukupona pamusebo nokupunda, “Allah, Allah, Allah,” mpaka bafwa ne cipupu. Kabili ine na Billy Paul twaiminine palya no kumona umwaume abula ulupanga nokululasa pesamba lya mutima wakwe, na dokota aitila amenshi *uku* lubali kabili yapulila ku lubali lumbi. Ukumumona abula ici–icipimfya, ngo mufwi, noku cingisha ukupita pamulomo wakwe nokupula mumona wakwe, kabili ukwabula nokusuma itoni lyamulopa. Ukupisha utumuti mwisamba lya maala yakwe, alepunda, “Allah, Allah, Allah! Allah, Allah, Allah! Allah, Allah,” ngeflyo. Uwakwa Mohammed, kabili uukususha amatontonkanyo yakwa Yesu Kristu. Ena takwete Mupashi wa Mushilo. Iyo, iyo, lelo akwetefye ifyakumfwa mumubili. Ico nacilungama. Tuli. . .

172 Ubwina Kristu te myumfwilefye. Ubusenshi kuti bwapanga fimo fine ifya mano ngo–ngo–ngo bwina Kristu ifyo bwingacita; lelo ico te Cine. Tulefwaya i Cine. Kristu e Cine.

173 Finshi tucita? Natuipsha fwebene icakuti twiminine nga Samsoni, nomba, lintu aiminine palya aletontonkanya pafyo ali nokuba. Ndetontonkanya, ileelo, ichalichi cifwile caiminina no kutontonkanya pamo naine, pama mineti yanono, ifyo tufwile twali nokuba nga cakuti ifi fintu tafyacitile ifi. Ifyo twali nokuba!

174 Nomba caishile kumano yakwe, cimo cafikile. Nincetekela Lesa ali cicitile. Oh, nga cakuti kuti cacitikafye ifyo fine pano pa kambi! “Pali cimo icinga citwa.” Pali cimo icinga citwa. Lesa nikelela. Pali cimo icinga citwa.

175 Tatukwete inshita iikalamba iyakwikala pano. Inshita yesu ileya ilepwa. Ukumana akapi kwama chalichi ekule senda icalo. Cena cili nokwampana pamo nabu Katolika. Natukwata umuntu mulya bwino bwinofye.

176 Ndekabila nga Nacikwata inshita iyakuya muli ico, ukulangisha ukuti ici calo cilifye bwino bwinofye kwati ni Israeli. Baishile mucalo iceni, batamfyamo abekashi, kabili bapyana necalo. Ico eco twacitile. Israeli, bena balikwete umuntu wakubalilapo, umukalamba, umuntu uwaba kwati Yohua, umuntu uwaba kwati Davidi, kwati Solomoni; lelo mukulekelesha kwaishile umuntu pabu—pabu fumu, Ahabu, cisanguka. Twalikwe umuntu umukalamba, mu Washington, Lincoln; lelo nomba cinshi bacitile? Icintu cimo ico ifwe twaishile kuno buntungwa, mwali bubika mu White House, pantu imwe mutontokanya ukucilapo palwa fikansa fya calo cenu yenu ukucila pali Kristu. Nacilungama bwino bwino.

177 Kabili ibukisheni, pali ilya nshita, bonse bacilolo bali cimbile. Yesebeli ewali intungulushi. Kutikeni, Ahabu palwakwe aali muntu umusuma, lelo Yesebeli ewali kunuma yabu tungulushi. Ena ewale cita ico. Ewali cisanguka. Nshikwete icabipa ukulola kuli ulya muntu, nga kateka, lelo ni ilya imibombele iyakwa Yesebeli eyali kunuma yaico. Bushe tamulemona, aba ba papa nefintu ifileingilamo nomba, umo euleimya ico ukutila “nshimwishibe Yosefe.” Kabili icintu cakubalilapo na mwishiba, ifwe ino inefye nshita tule ipusha ichalichi caba Kailishanya ukwikatana pamo nacena, kabili akabungwe konse ka kengila mu kwikatana kwama chalichi, kabili napo epo mwaba muciteyo.

178 Tuleikalila mundalama shamusonko ishi kalubulwa mummyaka amakumi yane ukutula ileelo. Icalo tacikwete indalama. Nikwisa luli? Ni nani uuli ne ndalama? Ifwe tatukwete isho? Ikwishibana kwesu—kwesu tekusuma. Tufwile twakwata golide. Ninani uukwete iyo? Chalichi ca Katolika. Finshi bakacita? Iintu ababaume bakalonga wabwalwa bwa wiski nabonse aba abakalamba abakwata nabakasunga bafipawo baka filwa, bakashitwa bonse, nechalichi cikakongweshwa icalo indalama. Kabili ifyo lukacita, lu kashitisha insambu sha bubeli

mulya mwinefye muli bu Katolika. Nomba imwe mukacita shani? Uyo e golide we sonde, bena naba Yuda, kabili ico ecipangano ico alepanga na Israeli.

¹⁷⁹ Mwamona, imwe bakabelenga ba Baibele kuti mwafunda ico muchalichi cenu. Mwamona, Ine nde mulangafye Nacetekela icintu cimo cine.

¹⁸⁰ Ifyo eflyo cili nokwisaba, kabili natu cikwata kulya ili line. Kabili tuli pano, akabungwe, nolulembo lwa ciswango pali ifwe, ifyo finefye nge ciswango capa kubala; icipasho kulicena, ukwampana kwama chalichi, ukuilunda kumaka. Kabili bapangile icipasho ca ciswango, ukuti cena cingalanda, kabili cacitile icintu cimo cine iciswango capa kubala ica citangilile. Mukati kesufye! Oh, mwebana!

¹⁸¹ Ni nshita nshi? “Bushe kuli icinga citwa?” Samusoni aiminine palya nokutiila. Ni nshita nshi? Shi, “Bushe kuli icinga citwa?” Samsoni abalile atontokanya, “Ulya Lesa umukalamba! Uwabapo lyonse. Ena e Lesa wa muyayaya. Namona icilubo candi. Nala lapila.” Kabili alilile.

¹⁸² Kuli icingacitwa ukuti kuti twacita icintu cimo cine. Bena aba shilya inshiku. . . Buno bushiku ta bamona icimonwa, nga Samsoni. Nga cakuti kuti twamonafye icimonwa ca cingacitwa! Tampileni pano pene, ili line. Icingacitwa, mwamona.

¹⁸³ Bena nabekalisha, nokutota indupi shabo, no kuntontokanya cinshi calaswa cibe. Muli nokwishiba ubushiku bumo, mukesa fuma nga kalutwe ka kalusengo, mwamona, iyo inshita. Ukukwata ukulongana ukukalamba, nefya beka, ifintu fye sonde, “Oh, twatontokanya, ukuba, na wishiba ukuti? Natu kwatilapo ba membala ukucila abo twatala atukwata. Kabili kuti twakula ifikulwa ifya ba bilioni wama dolla, na tukwatilapo indalama ukucila isho twatala atukwata, ama chalichi aya wama ukucila limbi nayo ba Protestanti nangu bambi bakwata. Oh, we mwaume! Amasambililo; ukuba, tu latwala abana besu kusukulu, kabili tulebakulila ama seminali yapya ukwingilamo bena.”

¹⁸⁴ Leken i mwebe nomba line. Umwaume na masambililo, ukwabula Mupashi wa Mushilo, aleisenda umwine, onse digiri apoka, ala talukilako ukufuma kuli Lesa. Ico nacilungama. Mwatila, “Nali kwata Bachelor of Art.” Nomba ninshi na utalukilako panono ukucila ifyo wali. Balepula ilini ukufika pali atom, no kuipununa ku musanse wacani untu taba ishiba nelyo cimo palwa uko. Mwa lyumfwa insoselo ya kale, “Ifipumbu fyenda ne nsapato shapampamikwa ifyela apo aba Ngeli batina uku nyanta.” Ico cacine, amasambililo, lelo tayaleta u Mupashi. Tayaleta imilimo no Bumi bwakwa Yesu Kristu.

¹⁸⁵ Ubwafya ni ubu, ichalichi ileelo tacili nga Samsoni. Tabali abaiteyanya ukulipila amalipilo. Samsoni apepele bwino ilyo apepele, “Shikulu, lekeni imfwe nabalwani.” Ena alishibe

ali nokulipililapo icintu cimo. Ena alishibe cikalipililwapo icintu cimo. Uli nokulipililapo icintu cimo, ndi nokulipililapo icintu cimo; ukwishibikwa kobe, incende yobe ne cifulo mu cilonganino. “Shikulu, lekeni, imfwe, kanshi. Namona umulimo Wenu.” Ena alishibe ali no kulipililapo icintu cimo. Mufwile mwaba abaiteyanya ukufwako, ku mulwani wenu, pakwingila mumapalo yakwa Lesa. Samsoni ali uwaiteyanya ukulipililapo, pa kukwata amaka yakwa Lesa nakabili pali ena. Ali uwa iteyanya ukucicita. Bushe uli?

¹⁸⁶ Bushe muli abaiteyanya ukutula ubutantiko bwenu ubwa pacitunshi tunshi? Kabili, namwishiba, caleba icilubo kuli ifwe ukuya ku bunkolanya. Lelo nomba ciwa alibika bumo pali imwe, aciletafye mukati ka ng’anda pamo naimwe. Ico nacilungama. Mwamona?

¹⁸⁷ Naletemwa ukuya kulya kuli kashimikila umukote uwa ku Methodist, aletemwa ukwimba ulwimbo:

Twa kooseshe imilando, twakooseshe imilando.

Twa suminishenye no lubembu;

Twa kooseshe imilando, impaanga shafumine kunse,

Lelo imbushi shaingilemo shani?

Imwe mwakoseshe imilando, epela.

¹⁸⁸ Oh, Naumfwa umo atila, “Nomba lolelako mineti umo, Munyina Branham, na tukwata ukupuputulwa!” Ee, cinshi ico? Ku puputulwa kwa filonganino. Ico cishinka. Lolesheni pa mibele yenu no kupusana kwenu. Bushe kupuputulwa? Bushe kuli inshita ya kupatukana? Bushe kuli inshita iyo uuli onse enga ampana pamo no kukwata isenge? Nga cakuti akabungwe kenu emo kali, “cilifye bwino.” Ukutalukilako ukufuma ku Cebo inshita yonse, ico cacine, ukulapanga ba bishopu bapya nefintu fyonse. Mwamona?

¹⁸⁹ Samsoni alishibe ukuti mumibele alimo iya kubwelela inuma pali iyi inshita teti ilete amaka ya mpika ya nshita.

¹⁹⁰ Mwe baume na banakashi, ba munyina naba nkashi, lekeni insose ici. Ichalichi, mumibele ya filonganino intu cilimo pali ino nshita, teti cikwate amaka yakupinkana nenshita, uku ciita inshita. Abaume na banakashi balekabila Lesa, imitima iifuma cumi. Kabili kuti mwasha ba—ba oneness no kuya kuli ba twoness, kuti mwasha ba twoness no kuya kuli ba threeness, kabili kuti mwacita fyonse *ifi*, *filya*, nangu *fimbi*; imwe mulekulafye ipepala, nangu—nangu ukwendauka muli bumishoni, nangu uku lacita kwati Nshishibe cinshi, umwaice. Ico nacilungama. Imwe teti mucisange ifyo. Amaka yesu ayakubwelela kunuma, teti ya kumane nempika yanshita ino. Ifilonganino teti fipokelele ukushininkisha kwa Cebo.

¹⁹¹ Lintu, Yesu Kristu, ngefyo Naeseshe ukumweba mailo ubushiku, alaile ici munshiku shakulekelesha. Ena alaile cena ukubako kuno. Naimwe mwalishiba ico, ukupitila muli Baibele. Kabili pa myaka ikumi na isano, ukuya no kubwela ukucilinganya icalo, nabo balebipilako inshita yonse. Ico cishinka. Mwamona, bena tabalecifwaya.

¹⁹² Bena batiila, “Ukuba, nomba, ena ampana naba oneness,” nangu, “Ena ampana naba trinity. Acita *ici, cilya*, nangu *cimbi*.” Ifwe twampana na Kristu, kunse muli cila kabungwe, ukweshasha . . .

¹⁹³ Lelo Lesa eulolekesha pali ico, ukuti bena ba Cimone. Kabili abacetekela bene bene baba kwati cilende umunono, ubushiku bwapitile; ilyo linefye Cabyatile munshila yakwe, nalulya ulubuto lwa Mweo ulwali mulya, ena a Cicetekele. Capwa, ca ambwishe umulilo ilyo line. Lintu pali amakana abaiminine kulya, abale Cipumya, lelo te ena. Ena ali shibe ukuti ulya ali ni Messiya. Ena alishibe ukuti bulya ebwali ubulayo, ukuti, lintu Akesa, Akacita ico.

¹⁹⁴ Ndetontonkanya, nga cakuti ifwe twalishibe icintu cimo cine! Bushe ifwe natufimbwa sana mu kabungwe kesu, ifwe twali leshiwa nokuloleshafye kuli Cena? Ndetontonkanya nga cakuti imwe mwalolesha muli ba—ba magazini ne fikope, nefiko ifibi ifyakale ifye sonde, mucifulo caku belenga Baibele yenu ngefyo mfwile ukuba? “Umuntu tekuti ekale nomweo kucakulya ceka, kano ku Cebo conse icifuma mukanwa kakwa Lesa.”

¹⁹⁵ Abana besu, abalumendo besu, na baaluka ibumba lya tu Ricki natu Ricketta, na mwishiba ico nacilungama, ibumba lya-kubutusha imyotoka na fyonse ifyapala nge fyo. Kabili nikwisa mulesanga umulumendo wamu Pentecosti? Na motoka yakwe iibutukisha, pamusebo. Nikwi mulesanga inkashi? Kwisamba ku kantini kumo, aleshana loke-na-lo? Nikwi mulesanga taata na mayo? Taata, kunse aleangala ubwangalo bwa gofu, nangu kunse ukuntu kumo ukuli ngefyo, kabili mayo kunse mu kusefya kwa kupikula nokubila ukwebumba limo lintu abamo, nangu icintu cimo. Lintu, cifwile ukuba ning’anda aba kolongene pamo pesamba lya butungulushi bwa Mupashi wa Mushilo, na Baibele ukuibweshasha na kabili. Ifyo efyo twasendwako. Tekususha, lelo kumisunkanyafye panono, mwamona, ukumona ukuti mwalailuka.

¹⁹⁶ Inshita yonse, kabili (oh, Mfwile ukwisala) aba Pelishiti tabatalile ukwishiba ica lecitika. Kwali icintu cimo icalecitika, pantu icintu cimo catampile ukwenda mumutima wakwa Samsoni, “Kwali icingacitwa,” mwamona. Apampete kunuma ukumona nga ekocicili.

¹⁹⁷ Bamo abanakashi balakwata inshita ya bwafya nomba, ukwishiba cifwile ukukwatwa. Lelo moneni nga cakuti ubulayo

Bwakwe epo bucili, moneni nga cakuti Ena acili ali cita... Pampantenifye kunuma noku mona Ena nga tali umo wine mailo, ileelo, no muyayaya.

¹⁹⁸ Ena ali cumfwile. Ena alishibe kwali icintu cimo. Aimishe umutwe. Takwete amenso. Bena tabamwene ifilamba filelukuta ukufuma mufipunda fya menso, umo utufumya ifilamba twaleleka ifilamba ukupona panshi. Umutwe wakwe mumuulu, imilomo yakwe ileenda panono panono, ifilamba filepona mu fipunda ifyatonkolwa. Ena alelapila. Ena alishibe ukuti Yehovah acili uwa mweo. Cibe alilufyenye, ena alishibe Ena acili ni Lesa. Ifilamba filepona ku masaya yakwe, ilyo aiminine palya. Aba Feleshiti bali naba kolwa nganshi icakuti tabamwene filya.

¹⁹⁹ Nga cakuti ba membala mu chalichi cenu, aba nenu mu chalichi tabacimona, imwe twalililenifye ukupepa. Ena alefwaya ukumona, umuku naumbi, i Cebo cakwa Lesa ukulengwa ukumonekela kucinso cabalya abapofushiwe, ibumba lyaba cakolwa abasenshi, abashacetekela. Nga cakuti ico ensala ya chalichi ileelo, ukumona umuku umo, ukwakale, ukupuputulwa ukwatumwa na Lesa, ukufuma kucintamba ukufika kuli kalinda, ukusambwa ukwakale, ukupuputulwa ukwa kale namaka yakwa Lesa, i-i Mbila iisamfya umuntu saana, ukufuma mukati ukwisa kunse; iya ololoka nge mfuti, ukwakale, mu mpanga, mu muulu umwabula amakumbi, ukwipaya, imipepele iipaya ulubembu iifumyamo Hollywood onse muli imwe, abo aba temenwe.

²⁰⁰ Palya epo ena ali, alepepa. Tecilonganino icipya nomba, isambilisho lipya; lelo kushininkishiwa kwa Cebo. "Shikulu, Mwali pali ine nshita imo, Mwali mpele amaka inshita imo. Nga cakuti Nakwetefye yalya maka! Ninkwata iminofu, lelo intu yanaka."

²⁰¹ Natukwata bamembala, lelo bena bantu banaka. Bena batemwa ifintu ifya mwisonde ukucila ifyo bacita ifintu... Mwatila Ine ndi onse... Oh? Lolesheni pachalichi nokusanga. Mwiesha ukukana ico. Imicitile yenu ilandishapo ukucila amashiwi yenu ifyo yacita, mwamona. Oh, ee, mwakwata ba membala abengi, iminofu iikulu, lelo amaka yakwa Shikulu yali kwi? Iminofu yenu iikulu tayakumane nempika ya nshita ino, icicetekelo cakusumbulwa ukufumya i Chalichi kunse yaici cintu ilyo ubupingushi tabulauma isonde.

²⁰² Kabili ubupingushi buli mupepi nokucitika. Nalasosa, nga fintu umunandi Jack Moore asosele; Nga cakuti Lesa aleka Amerika uku twalilila nefintu alecita nomba, Ena akaba uwa shingamwa ukubusha Sodomu na Gomorrah nokulomba ubwelelo kuli ico, pa kumoca. Cisuma! Ubupingushi ebulekonkapo.

²⁰³ Lesa, fumyenimo isonde lyonse muli ine. Mpeni icicetekelo, O mwe Shikulu, ica Kusumbulwa. Pantu, bakaba babili

pa busanshi, na umo akasendwa, umbi akashala. Babili bakaba mu—mucipuna camuli motoka, umo akasendwa naumbi akashala. Cena cili nokucitika mukashita akanono.

Mwatila, “Munyina Branham, nililali cikaba?”

204 Imwe limbi kuti mwasusha ici. Nga cakuti cili icalinga ukucisosa? [Ba kashimikila batila, “Twalilila nokucisosa, munyina.”—Kale.] Leken i imponeshemo akantu kamo akanono apa. Ubushiku bumo muli nokwishiba.

205 Imwe mukasosa kulya, “Oh, Ine nafundwa ukuti kuli *ici*, *cilya* ne *cibiye*, icika citika lintu Shikulu talati ukwisa. Kukaba inshita yabucushi bukalamba, kabili tulino kupitamo.” Mwamona? Mwamona?

206 Namwishiba, inshita imo Yesu ba mwipwishe ilipusho. Atile, “Cinshi bakalemba basosela abati Eliya afwile ukubalilapo ukwisa?”

207 Kabili Yesu atile, “Ndetila kuli imwe, Ena alisa kale, na imwe tamwaishibe ico.”

208 Bumo munshiku ishi muli nokusosa, “Ukuba, Natontonkenye i Chalichi cali noku, cita *ici*, *cilya* ne *cibiye*. Natontonkenye kuli nokuba uku Sumbulwa. Natontonkenye . . .”

209 Mwamona, cikaba kusendwa kwa munkama. Nga cakuti Asendele umo pano mu Hot Springs, naumo kumbi ukwashala, kabili umo kwisamba kulya, naumo kulya, cikapanga mucituntulu ama milioni ya abo bonse abakafuma mu mushili. Kabili kuluba kwen abantu mupepi na imyanda isano, cila bushiku, abaluba mwi sonde, naifwe tatwishiba nokobaya. Mwamona, uku Sumbulwa kukalenga bonse abo abalala mulukungu lwamushili, abo abalungama na Lesa.

Bakatila, “Ukuba, Natontonkanye uku Sumbulwa kwali nokucitika.”

“Kwena kwalipita kale, naimwe tamwaishiba ico. Mwalishala.” Mwamona?

“Ukuba, ifintu fyonse fili nokuya . . .” Ee, mukwai.

210 Kwena kwisa kwa Munkama, ifyo uku Sumbulwa kwaba, kwisa mukwiba ukusenda. Kwati nililya ibuuku Na belengele ilya inshita (cali ni cinshi), ni Juliet na Romeo. Aishile munshita yabushiku, lintu abantu bali nabalala muli buli sonde, kabili ne chalichi na conse muli buli sonde. Kabili mukupumikisha, ukubilikisha kwaisa, kabili efyo bena baile.

211 Kutikeni, mwalyumfwa ifintu ifingi mu Bashi Makwebo abena Kristu, baleti, Abaume ba Mbila Yapwiilika, baletila, “Oh, namwishiba, Rev. Taata Wamushilo *Wakuti na wakuti!* Ba Presbyteriani na bamba ukupokelela u Mupashi wa Mushilo. Ba Lutherani nabatampa ukupokelela u Mupashi wa Mushilo.”

212 Imwe mwebumba lya bantu abalele! Bushe tamwishibe? Yesu atile, “Lintu ulya na cisungu uwalele aisa mu kushita a Mafuta, yena yali ni ilya ine nshita iyakuti Shibwinga aishile, kabili ena aingile mukati.” Ibukisheni, bena taba Cikwete! Bushe ico nacilungama? [Ulukuta Iwatila, “Ico nacilungama.”—Kale.] Nga fintu Booth-Clibborn alandile, “Huh?” Uh-huh. Bena kuti limbi ba pitile mufya kumfwa umfwa, lelo mu icinecine taba Cikwete. Lintu baile mu kushita a Mafuta, ninshi inshita naipwa.

213 Kabili bali pano nomba, ba Prebysteriani, ba Lutherani; lolesheni pali ilya Bashi Makwebo ba Mbila Yapwililika *I Shiwi*, kabili nalilya ibumba lya benschikulu baba Pentecosti pamo naba ababwananyina bamu filonganino, uku tontonkanya ukuti cilya cintu cimo icikalamba. Limbi ubushiku bumo kuti waipusha, “Ukuba, Natontonkanye *ici*.”

214 “Cena calipita kale, kabili tamwacishibe ico.” Lekeni ndekele apo, pantu Ine—Ine nshili pano ukushimikila pesambilisho.

215 Lelo, pali ifi fintu! Taufwile ukubulapo inshita. Buno bwine e bushiku. Ino ine e nshita. Palipo ici ngacitwa nomba line, limbi te pa faifi koloko. Palipo ici ngacitwa. “Shikulu, Ninjishiba Nimwe Lesa. Ninjishiba ukuti Imwe muli. Ninjishiba ukuti ine nalifuma kuli Imwe. Lelo Ninjishiba ukuti iyi imishipa yandi nga yabikwamo namaka yakwa Lesa. Nalishiba ifintu ifyo Ine nsakamana ileelo, Nanda ukutila nine Pentecosti;” abanakashi, “Ine ndaputula umushishi wandi;” umwaume, “Ine ndacita *ici*, *cilya*, nangu *icibiye*.”

216 Naimwe mwebaume abasuminisha abakashi benu ukufwala utuputula nokucita ifyo fintu, kabili noku ita umwana mwaume wakwa Lesa, cansoni kuli imwe.

217 Naile ku chalichi cimo icikalamba ica cilonganino, te kale, kuli... Bena bakwete imisonkano, na Ine naile kuku batandalila. Kabili kakumba amfumishe panse, kabili ale njishibisha ku mukashi wakwe. Ena ali nikalisha wa cinanda. Kabili ulya umwanakashi afwele indeleshi iya ikata nganshi icakuti inkanda yalifye kwati nikunse. Ali pentele, kabili afwele ifintu fya musango namusango mumatwi yakwe.

218 Kabili Natiile, “Munyina, bushe ulepilibula ukutila umukashi obe—obe untu ashila?”

Atiile, “Ee, mukwai.”

219 Natile, “Alemoneka kwati taaba.” Natile, “Nshatala amonapo icaba ngefyo mwi shina lya Pentecosti na holiness!”

220 Oh, munyina, tulekabila ukuwanya kwa ng’anda, ukufuma kucintamba ukufika napesamba. Kabili bumo muli ishi nshiku. . . Iwe watiile, “Ndi Pentecosti.” Ico tacilepilibula ukuba ukucila pa nkumba, kuli Lesa. Ico tacikwete nangu cimo ica

kucita na Kristu. Ilyo lishina fye. Ufwile ukuba Pentecosti mumutima obe, ifisabo fya Mupashi. Moneni. Oh, owe!

221 Ena alishibe icali nokucitika nga cakuti Lesa alyaswike ipepo lyakwe.

222 Bushe namwishiba? Bushe namwishiba ukuti akabungwe kali nokumisukula? Bushe namwiluka ukuti nombaline mwalaya kukwampana kwama chalichi, nefintu ifyo imwe muleingilamo? Bushe namwiluka ifyo muli nokulipililapo? Namwishiba abo abanakashi mwangala nabo injuka bakamwita “aba kale” na fyonse ifya musango ulya? Pantu tamwa kasuminishe abana benu ukufwala utuputula, kabili imwe mulecita ifi fintu, namwishiba ifyo muli nokulipililapo? Cawama mufipende lintu tamulatampa, mwamona. Cawama imwe mwatontonkanyapo pali ici. Ee. Imwe cawama—imwe cawama mwa cilandapo na Lesa, pakubala, libe tamulatampa.

223 Ena alishibe, nga cakuti ipepo lyakwe lya lyaswikwe; lelo ena ali iteyenye, kabili ali uwa cishinka.

224 Nga cakuti ici chalichi kuti cabafye muli ilya imibele! Nga cakuti imwe namuipekanya nombamba line, nga cakuti muli abacishinka, nga cakuti namucipilibula icine cine, nga cakuti amenso yenu na yesuka kuco Ndemweba munshila iyaku shoka! Nga cakutilla imwe muli abacishinka, mutile, “Shikulu, Nshile sakamana ifyo cili, Ndi uwaipekanya. Namona icishibilo. Ninjishiba ukuti nacicilapo napafyo tutontonkanya. Ninshita yakwisa.”

225 Nomba Samsoni apundile, “Shikulu, naba ntonkola amenso yandi. Ninjishiba ukuti Imwe muli Lesa. Ninjishiba ukutilla Imwe namukwata amaka ayakucita ico. Ninjishiba kuti Imwe kuti wankankwala ukufuma muli aya amakoli. Umukufye umo, Shikulu, umukufye umo!”

226 Umukufye umo, Shikulu, umukufye umo! Lekeneni kube umusonkano wankambi ku lubali lwalupili, kwati nifilya cali pa upili pa Muputule-wapa Muulu. Lekeneni kwise iciunda ukufuma mu Muulu, kwati cipupu cikalamba icilebutukisha, isusheni ing’anda yonse, icakumoneka icituntulu icaku shininkisha ukubuka kwakwa Kristu.

227 “Umukufye umo, Shikulu, umukufye umo,” ena apundile. Nga fintu apundile, mucishinka, naimina palya, namenso yakwe ayapofula. “Ninjishiba umutengo, Shikulu, lelo umukufye umo!”

228 Lesa alasuka amapepo. Ena aumfwile imishipashipa yatampa ukwikatana. Iminofu yakwe yatampile ukwikata. Amaka yamomolu yakwe yatampile ukubwela. Atile kukalumendo akaice, “Ntungulula kucipilala nombamba.”

229 “Ntungululeni, Shikulu, ntungululeni. Ntungululeni kucipilala, ku Kalbale. Ntungululeni ku lureshi uko

Ningatnikwa, mpaka ubwikashi bwandi ubwakale ubwa mwi sonde bufwile pano pene, kabili nafyonse fintu Ndi. Ntungululeni kucipilala, Shikulu.”

²³⁰ Lintu ena atampile ukumfwa iminofu yakwe ukwikatana pamo namaka yakwa Lesa, ena talefwaya ukuti amone icalecitika, ena aumfwile icalecitika. Atampile ukusunsha ifipeya fyakwe, kabili, lintu acitile, icikulwa cawile panshi. Bulya bushiku, acimfishe, ena aipeye aba Pelishiti ukucilapo pafyo abepeye munshiku shonse isha mweo wakwe.

²³¹ Mwe fibusa, kuli icinga citwa ico ici chalichi, muli iyi mibele cilimo...Nomba Ninkwata nalimo amabula yatatu nangu yane ayalembelwe palya, Nalashako. Pali icingacitwa. Pali icingacitwa pano pene pali iyi nkambi ya musonkano. Pali icingacitwa pano pene pali ino nshita. Pali icingacitwa, nga cakuti tuli abaipekanya ukulipila umutengo, kuti twamona na imbi Imilimo ya Batumwa 2 ukucitika.

²³² “Umukufye umo, Shikulu! Twali fikasabanya. Twalyampanya. Twalyonaula bu munyina. Twali patula isenge lyesu. Twabulapo akalibumba akanono kuno *lubali*. Tule lwishanya umo nomunankwe, nakasebanya naikala kunuma, aletutamba tuleuma umo nomunankwe. Shikulu, cili icinga citwa ukuti umukufye umo ukutila bonse umwanda umo na makumi yabili palwesu kuti twaba nokumfwana kumo mucifulo cimo? Bushe cili icingacitwa ukuti kuti kwafuma iciunda ukufuma ku Muulu, ngo mwela wamaka uulepupa? Umukufye umo, Shikulu, umukufye umo!”

²³³ Natwiminine pamakasa yesu, nokutiila, “Umukufye umo, Shikulu! Umukufye umo, Shikulu!”

²³⁴ O mwe Shikulu Lesa, ng’umfweni, Shikulu. Umukufye umo, Shikulu! Umukufye umo tumeni u Mupashi pali ino nkambi yamusonkano, mumaka namubukata!



O MWE SHIKULU, UMUKUFYE UMO NAKABILI BEM63-0628M

(O Lord, Just Once More)

Iyi Mbila na Munyina William Marrion Branham yaletelwe intendekelo mu Cingeleshi pali Cisano ulucelo, mu Kapepo kakalamba pa 28, 1963, pa Associated Brotherhood Of Christians Campground mu Hot Springs, Arkansas, U.S.A., yafumishiwa muli tape iyambulwa kabili nalilembwa ukwabulo ukulundamo mu Cingeleshi. Uku ukwilula kwa mu Cibemba kwa lembelwe no kupelwa na ba Voice Of God Recordings.

BEMBA

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Icishibisho ukufuma ku mwine kalemba

Insambu shonse tashisuminishiwe. Ili buku kuti lya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalebwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org